

# *PEU HAINA SANDA*

## *HAMOHO NI SIKAPI*

 Halu yemeñi ona cwalo fa nako nyana kwa tapelo. Halu inamiseni litoho za luna.

<sup>2</sup> Mulimu Yomunde, lu talima taba ye kuba tohonolo yetuna, busihu bo, ya kuba mo mwa nako ye, kutisa Kreste kwa lifasi lelishwa ni kwa lusika lo lushwa.

<sup>3</sup> Ne lu ka kupa, Mulena, kuli Utoze manzwi a luna ni buikatazo bwa luna, kuli li si ke za kuta ku Wena mukungulu fela, kono li taleleze seo li lumezwi.

<sup>4</sup> Tusa muuna kaufela, musali, mushimani, kamba musizana, mo busihu bo, ya tokwile. Mi, Ndate, lu ziba kuli luna kamukana lu tokwile. Mi cwale ha lu ka zwa, busihu bo, lu ikutwe mwa lipilu za luna inge bani bene ba zwa kwa Emausi, kasamulaho wa...ku iponela bupaki bwa zuho ya Kreste, se bali, "Kana lipilu za luna ne li sa cisi mwahala luna ha Na sweli kuambola ku luna mwa nzila?" Lumeleza cwalo, Mulena.

<sup>5</sup> Folisa bakuli ni ba baimezwi. Mi kusike kwaba nihaiba ya fokola yomukana mwahala luna kasamulaho wa sebelezo busihu bwa kacenu. Mi fahalimwa lika kamukana, kusike kwa siyala nihaiba alimuñwi ya sa lumeli, Mulena. Kaufela bona ba lumele Bupilo Bobusafeli, kakuli wani kona mulelo wa luna wa ku kopanelo mo.

<sup>6</sup> Limbuyoti ze lu likupa ka likute la Mubuso wa Mulimu, ka Libizo la Jesu Kreste, yena Mwana Mulimu. Amen.

Mwakona kuina.

<sup>7</sup> Ki bunde, busihu bo, kukutela mo. Mi Ni bona kuli luna ni ba banyinyani baba yemi kwa matuko, mi Ni sepa kuli—kuli mawaile a kwaluhile cwale, mwa litolopo zeñata ze shutana mwahala naha; San Francisco, Tucson, ku kambama kwa upa. Mi luna, kuya ka mawaile, lu luma litumeliso ku bona. Lu mwa muyaho mo busihu bwa kacenu. Mi muyaho omutuna utezi, ni mwa kufita mwa tunzila; ni kwa mamota, ku yemi batu babañata. Mi lu utwisisa kuli kamuso busihu luka kwalula neku leliñwi kafa, kwa muyaho wa lipapali za kutiisa mibili, ni kuba ni muyaho omutuna nyana oka kwana mwendi sicaba se si likana likiti cwalo hape kamba kufitelela. Kacwalo lwa sepa cwalo, kamuso busihu. Haiba kutezi cwana busihu bo, busihu bwa pili, kupalañi, lu lumela kuli ikaba butuna luli kamuso busihu. Mi Ni bona bainzi mwa lipula zeñwi ze bulukiwanga fela, ni zeñwi, hape, busihu bwa kacenu.

<sup>8</sup> Lu mwatasa tibelelo yetuna; pili, ka Kutaha kwa Mulena Jesu; se sitatama, ki puluso ya...mioya ye latehile yeka Mu amuhela busihu bo ni ku itukiseza Kutaha kwa Hae fani ha Ka bonahala.

<sup>9</sup> Ni bata kufa litumeliso ze ipitezi ni kamuhelo kwa baana ba kaufela baba inzi kwa pata, ili bao Ni utwisisa kuli buñata bwa bona ki bakutazi. Ki mianda cwalo, kamba kufitelela, baba inzi kwa pata, mi lu itumezi hahulu kuli bateni mo.

<sup>10</sup> Ku mina sicaba kamukana, kai kaufela ko muinzi, mwa libaka ze shutana mwa na... Mi Ni utwisisa kuli babañwi bateni mo kuzwa mwa buse bwa liwate, linaha zwa mwa buse. Kacwalo lu itumezi ka mina fa kuba mo ka kuikola sebelezo ye ni luna, yeo luli mwatasa tibelelo kuli Mulimu uka lufa yona mwahala mukopano wo.

<sup>11</sup> Ku bonahala fela, kuli ibile Ne ni hupuzi ka kukuta mwa mazazi a likani nyana a mukopano, kuli pilu ya ka isabile hahulu ka maikuto amatuna kuli sesiñwi si sutelezi kuezahala. Hani zibi fela kuli ki sikamañi, kono Ni sepa kuli ki sinulo yetuna yezwa ku Mulimu, ye ka—ye ka lu lukisa ni ku lu eza kuba batu ba na ha babande ba Mubuso wa Hae halunze lu zamaya mwa lifasi la lififi le la sibi ni kusalumela.

<sup>12</sup> Sibaka se busihu bo, ona sibaka ona se luli, si ni swalezi nto yetuna. Kuzwa fo ne Ni zibeki kuli neba yahile muyaho omutuna wa sikolo kwanu, Ni bile ni tabela kuba ni sebelezo mwa sibaka se. Ni itumezi hahulu kwa bazamaisi ba sikolo ni ku babalu lukululezi kuba ni sona.

Neli ona fa sibaka se, ona fa sibaka luli fo ku yemi ona muyaho wo busihu bwa kacenu, fo ne ku ezahalezi taba yetuna myaha ye mashumi amalalu kwa mulaho, ona fa mubu oswana fa. Ne si nto isili kwanda kuba fela simu ya macacani ka nako yani. Mi ne Ni pila mwa ndu yenyinyani kwa buse fela kwanu, mwendi ka liñokolwa ze mianda yemibeli. Ne ni bilaezwa hahulu mwa mazazi ani ka puluso ya bo ndate ni boma. Kuli, sibeli sa bona baile busihu bwa kacenu. Mi sihulu, mwa lizazi lani, Ne ni bilaezwa ki bo ndate. Na hupula, Ne ni lobezi mwa makozwana. Ne ku cisa, nako ya mbumbi.

<sup>13</sup> Se si ñozwi, Na lumela, ki mwa kabuka ka kanyinyani kaka bizwa kuli *Jesu Kreste Yaswana Maabani, Kacenu, Ni Kuyakuile*, kamba mwendi neli mwa kabuka ka kanyinyani kaka bizwa kuli *Neni Sika Hanyeza Pono Ya Lihalimu*.

<sup>14</sup> Mi nenze ni lobezi mwa makozwana, se Ni zuha kapili, mi mutiyo wa taha fa pilu yaka bakeñisa bo ndate. Sina, buñata bwa mina sicaba mwa tolopo ye kwanu ha muziba bo ndate. Ni sepa kuli nebali baana ba batuna, nihaike nge nabali ba ezalibi. Mi, neba nani mukwa o maswe, one Ni lika ku lwanisa taba yani katata mo ne Ni konela, mwahala lilimo, wani neli, kunwa. Mi busihu bwani ne ba nwa. Mi Na zuha ni mutiyo omutuna mwa

pilu yaka ka bona. Mi ne ni tinile fela liapalo za kulobala ni zona, na to telela mwa bulukwe bwaka, hembe yaka ya pajama ne isiyezi fa mibili; Ne ni zamaile mwahala simu ya macacani, kuya bukaufi fela ni ko ku yemi tuyaho wo cwale, mi Na kubama ku lapelela bo ndate.

<sup>15</sup> Mi hane Ni sweli kulapela ni ku kupa Mulimu kuli aba pilise ni kuli asike ku—ku ba tuhelela kushwa bali baeza libi, kuli ne Ni balata; mi hane Ni sali mwa tapelo, se Ni yema kutalima neku la upa kuzwa kwanu, mi ne kuna ni pono. Mi fahalimwa ka fela, buñata bwa mina mwa iziba pono yateni, neli Mulena Jesu.

<sup>16</sup> Cwale, Na hani si ka itwaeza buhata, sina mo Ni zibela. Kono lipono ki za niti. Mi fani ne ku yemi Mulena Jesu, nako yapili yene Ni kile na Mu bona mwa pono ya mufuta o cwalo. Na li fela mwendi, oh, ka liñokolwa ze lishumi fahalimwa toho ya ka, inza yemi mwa moyo mwa mbyumbyulu, ni liutu leliñwi inge yabata kutambuka. Na apezi sapalo se sisweu, ni bulizi kwa matuko a sona. Nana ni milili ye wa fa maheta a Hae. Na bonahala kuba sina, Muuna yo Bibele i bulela kuli Nali cwalo, wa myaha ye mashumi amalalu. Kono, yo munyinyani, Mutangana yo musisani, yo musisani luli, na bonahala inge kuli Na sakoni kulikana buima bwa lipaundi ze mwanda ni mashumi amalalu.

<sup>17</sup> Mi Na talima, mi Na hupula kuli neli zeñwi fela, kuli mwendi Ne ni lyangani. Kacwalo Na—Na itiinya mwa meeto ni—ni kutalima hape. Mi Na yemi neku leliñwi, mutualimelo wa sifateho sa Hae. Mi mubonahalelo wa sifateho sa Hae, wo Ni bile nibonanga mwa lipono, ubanga inge toho ya Kreste ka lilimo ze mashumi amalalu yana kile aswanisa Hofmann. Kona libaka hani Na ni zona mwa ndu yaka, mwa libuka zaka, kaufela ko Ni kona kubeya sani, kakuli kona mo si bonahalela, hahulu mane inge ona cwalo. Fela, Yena na bonahala kuba bu nyinyani.

<sup>18</sup> Mi hane Ni sweli ku Mu talima, Na hupula, “Kaniti ha Ni talimi ku Mulena ka ya yemi fani.” Mi ne Nili ka mufuta wa kuli, Ni kali, mwa siyemo *se*, mi mwendi ona fo ku yemi *se*, kwatasa fo kuinzi katala ka cwale. Fokuñwi, neli ona mwa sibaka *se*, mwahali-hali, ni butelele inge fo Ni yemi, mo Ni kona kupimela ka swanelo, mwahala liñokolwa ze mashumi amane kamba mashumi a ketalizoho kokuñwi mwa sikiliti *se*, ona sikwenda *se*.

<sup>19</sup> Mi Na talima mwa halimu, mi Na yemi fani. Ki ha Ni ituma kwa munwana, kubona haiba ne Ni lobezi. Mwa ziba mo mu kona ku . . . Neku bonahala fela inge kuli ne li sike kuba cwalo. Mi Ne ni sali fela mwanana ku Mulena ka nako yani, mwendi wa likweli ze silezi zene Ni se ni kutalize. Na to ituma kwa munwana. Na to kumula kacwani ni kuka loba. Mi buñata bwa mina batu baba pila mwa mahae, mwa ziba kuli kani ki kakota ka kuiconkomonisa mwa meeno, cwalo, ki mwa macacani. Se Ni kala ku ka tafuna. Mi se Nili, “Ha—ha kukonahali. Na lola. Ki

lani lapa laka. Ki bani bo ndate, boma, ni bana ki bani. Ki yani ndu ya kale ya sitina simbotela sene si banga kwanu, kone Ni zumanga macikwi, ki liñokolwa fela mwendi ze mianda yemibeli cwalo kuzwa fa. Mi ki Na yo ni yemi mwahala simu; kuswanela kuba ona cwalo.”

<sup>20</sup> Se ni laha mwa mubu, ku cuncula lihutu laka hanyinyani, mi na nyunga toho ya ka, mi—mi na sina mazoho aka, na talima mwahalimu hape; na talima kusili, na talima hape, mi ki yani Nali fani, inza yemi fani. Mi moyo se ukala kufuka, mi Na bona macacani inza fuka. Mi ha no kalile ku kasha, liapalo za Hae ne li fuka ni ona. Inge litino zeinzi fa mufoholo, se likala ku—ku pepela. Na yemi ona fani. Se ni mu talima.

<sup>21</sup> Mi Na hupula kuli, “Kambe Ne ni ka talima fela fa sifateho sa Hae!” Mi Na talimela kwa upa, ona kwa neku *le*. Na sweli kutalima kwani, ka tukufalelo. Mi Na shenya, kuli ni kute mwa mulaho, kuli ni talime hande fa sifateho sa Hae. Kono niteni ne Ni sa Mu bonisisi hande. Nana ni mazoho a Hae kwapata a Hae, nitaluse kuli na patilwe ko ne Ni yemezi.

<sup>22</sup> Se ni kuta kafa ni kafa hape. Mi se Ni ikomona fa mumizo, kueza sina cwana, kuli, “hum,” kubona haiba ne Ni ka hoha ngana ya Hae. Kono Na si ka shenya.

<sup>23</sup> Mi se Ni hupula kuli, “Mwendi Ni Mu bize.” Hane Ni bulezzi kuli, “Jesu,” A sikulula toho ya Hae. Mi ha Na ni talimile, Na tilo nanula fela mazoho a Hae ku a otolola. Zani kona fela ze Ni hupula. Kakuli, bukaufi ni musihali tuna, Ne ni lobezi kwani kokuñwi ko ku inzi ona sibaka se cwale, mwa simu; hembe yaka ya pajama kaufela ya kolobiswa ka mioko, kone Ni sweli kulila. Mi se Ni welela.

Sifateho sa Hae ne sina ni mubonahalelo wa kuli muswanisi hakoni ku—ku swanisa kamba ku penta. Hakoni kueza cwalo. Na bonahala inge Muuna cwalo, hane mu ka Mu talima, Na bata kulila ni makeke, mi ya likute ni maoyo; kono mane ni mata amatuna kuli, hana ka bulela, na ka fetula lifasi. Haili mubonahalelo haukonni kuswaniswa ki sikuwala sa baswanisi.

<sup>24</sup> Mi ne Ni sa zibi kufita ni lizazi le sene si taluswa ki sani. Kono fa Ni yemi busihu bo, kasamulaho wa myaha ye mashumi amalalu, ni yemi mwa tuyaho o filwe cwale kwa sebelezo ya Mulimu Yamata kaufela. Mi na, kakuba fela—fela membala, luli, yomuhulu fela wa—wa mwa sibaka wa—wa keleke ya Baptist kwanu, yeo Roy Davis nali mulisana wa yona ka nako yani. Mi cwale Ni yemi mo ni sibaka sitezi batu, ona mwa mubu o swana, mi . . . ku se Ni nahana kuli, ki teko ya Mali a Jesu Kreste Yena luli, mwa mazoho aka, kutisa Liñusa la mazazi amane le la Mulena.

<sup>25</sup> Ka likweli fela ze silezi kasamulaho wa sani, Ne ni tiloba ni kolobezo yaka ya pili kwanu kwa nuka, fani Liseli hane li tilo tuluka kwanu kwa Mukwakwa obizwa Spring. Buñata bwa mina

sicaba mwakona ku lakaza kuya teñi mi mu yo bona zani, kwa Mukwakwa wa Spring ni mezi, ona kwa pata fela a nuka. Mi kwani kona ko Lingeloi la Mulena ne li bonahezi fapila sicaba, pili, mi ka tu kiloko, musihali omuñwi. Mi Linzwi lazwa mwani, lali, “Sina Joani Mukolobezi mwa na lumezwi ku to etelela kutaha kwapili kwa Kreste, Liñusa la hao li ka etelela Kutaha kwa bubeli.”

<sup>26</sup> Fa seli myaha ye mashumi amalalu kasamulaho, mi fa Ni sa li teni, busihu bwa kacenu, ni bulela Liñusa lani. Ni mwahala lifasi ko Li ile, mi Ni tabile fa kukuta mwa tolopo ya hesu, busihu bwa kacenu, ku to yemela Mulena Jesu Kreste yo Ni lata ni cwale ka pilu yaka kaufela. Zazi ni zazi U zwelapili kuba ya munati kufita mwa Na bezi zazi la kwa mulaho. Ha Ni sika cinca nihaiba siemba nyana mwa Tuto yaka. Taba ya pili ye ne Ni kalile ni yona, Ni sa lumela taba ye swana ni busihu bo. Yena wa swana maabani, kacenu, ni kuyakuile. Cwale Ni na ni Liñusa le Ni na ni buikalabelo ka lona.

<sup>27</sup> Mi Liñusa hane li kalile lwapili, neli kuli, ka niti, mañi ni mañi; na sweli kulapelela bakuli, lisupo zetuna, ze komokisa, ni limakazo. Zene kalile, sihulu mwahala sicaba sa Mapentekota,ancafazo ya batu kaufela ya mikopano ya kufoliswa yene nyungule lifasi. Ka myaha ye lishumi ka ye ketalizoho ye kwanile kubile ncafazo yetuna fa lilundu kaufela le liliteni, Na sepa, mililo ya ancafazo isweli kutuka. Lu bulele kuli ma milioni amañata ba amuhezi Kreste kuba Mupulusi wa bona, ka yona tumo iliñwi yani. Yene susumelize, kuzwa kwani, ku Oral Roberts, ni babañwi cwalo, ni kuzwelapili cwalo cwalo, ka mo ne ipotolohela.

<sup>28</sup> Kasamulaho, keleke ya Pentekota ya lobala mwa sileze sa kuwa, sina mo ne kuinezi. Milelo ya ka ni litakazo, busihu bo, ki kuzusa keleke yani, hape, kwa Kutaha kwa Mulena Jesu ko ku sutelezi. Ni na ni ku i kalimela. Ni lukela ku omanya sibi ka mukwa kaufela o sili ka ona. Hani talusi ka kopano ya mutu ufi kaufela. Nina ni Liñusa.

<sup>29</sup> Cwale, kutata ku kenela keleke ka kukupa tuso, sina mo ne kuinezi fela ni Mulena luna Jesu, kakuli ki Yena; ha ki na. Kono sina ha Na kutilize lwapili, ni kufolisa bakuli, azusa bafu, ni ku kenisa ba mbingwa, ni kuleleka mioya ye masila, mutu ni mutu na Mu tabela. Kono kutahanga nako hakuna ni Liñusa leli latelela sisupo kaufela kamita, kakuli sisupo sina ni linzwi.

<sup>30</sup> Kono ha Na inzifafasi zazi leliñwi, ni kubulela kuli, “Na ni Ndate lu Nto Iliñwi,” sani ne li sesituna hahulu ku ze ne ba kona kuyemela. Ne li, hape, fani ha Na ize, “Kwanda kuli mu ce nama ya Mwana mutu ni kunwa Mali a Hae, hamuna Bupilo mwahala mina.”

<sup>31</sup> “Cwani?” Kiñi, madokota ni batu baba nahana hande ne ba ka bulela kuli, “Muuna yo ki mucabatu, ulika kueza kuli mu ce

nama ya Hae ni kunwa Mali a Hae.” Na si ka li toloka. Na li bulezi fela.

<sup>32</sup> Mi busihu bwa kacenu mwakona kuutwa lika, ni mwahala mukopano, ze ka bulelwa fela. Hakulata haluna kukona ku tatulula. Kono, muhupule, Jesu Kreste ki ya swana maabani, kacenu, ni kuyakuile. Lwa li lumela.

<sup>33</sup> Cwale, haluna nako ya kubulela hahulu zeñata, kakuli luna ni linako zeñwi za ku kalisa mo ni linako zeñwi za kuzwa. Mi lu bata ku kuteka katengo ka zamaiso ya sikolo kaka lu tomezi linako ze, mi luka eza kaufela ze lukona kuli luba kuteke.

<sup>34</sup> Muhupule, ka nako ifi kaufela yeo muezalibi abata kutaha ku Kreste, ze mulukela kueza fela ki kutaha ku yena, kamba Na kutaza, kuopela, seo kaufela sili sona, mi ufa bupilo bwa hao ku Kreste cwale, muyeme mwa sipula sa mina. Kona ze lu bezi teni mo, ku mitusa.

<sup>35</sup> Ni bata ku bulela ku Muzwale Vayle, Muzwale Rober-... Borders, ni mizwale kwanu. Haiba...Hani zibi haiba ne ba sike kuba, mwa keleke, mwa musihali, kamba kakusasana omuñwi, kamba sesiñwi, sebelezo ya ku luta ku bani baba bata kolobezo ya Moya o Kenile. Kikuli seo sikaba hande nji, mina mizwale? Muzwale Neville ni mina kaufela mwakona kuba kwani, ni Muzwale Capps. Haiba mutu ufi kaufela ubata ku kakanyezwa ka za kolobezo ya Moya o Kenile, mubone kuli mwa taha kwa tabernakele...Se sikaba bunde ki sifi, kakusasana kamba musihali?

<sup>36</sup> [Yomuñwi uli, “Kakusasana.”—Mu.] Kakusasana, mwendi ka teni kiloko? Mwendi ka teni kiloko ya kakusasana.

<sup>37</sup> Haiba muna ni puzo ka za Tuto, haiba muna ni puzo fa Liñusa, haiba mu—mu bata kuli...ha mu si ka kutazwa kale, ki yomuñwi, mubata ku lapelelwa, kamba sika kaufela se mubata kuziba ka mikwa yeo, ne ku kaba hande hane muka zwela kwani ka teni kiloko mwa kakusasana ni kubona baana ba. Ku kaba alimuñwi kamba babañata mwani ku yo mi tusa sikuka, kwa ku lapelela bakuli, kwa kualaba lipuzo. Kuba fela sina mutu ya fa tuso, kihande, uka...Muye fela ku bona, mi ba ka tabela ku mi tusa mwa mukwa ufi kaufela o ba kona.

<sup>38</sup> Cwale, lusika atumela kale Linzwi, lu bata ku atumela Mukalisi wa Linzwi hape. Mwakona kuca hahulu zeñata; mwakona kunwa hahulu zeñata; mwakona kuseha hahulu; mwakona kuzamaya hahulu; kono hamuna kulapela hahulu. “Ni tabela kuli batu ba lapele mwa libaka kaufela, banze ba nanuzi mazoho kusina kukakanya ni likañi.”

Halu lapeleni.

<sup>39</sup> Jesu Yomunde, Mukalisi wa Linzwi la Bupilo, mi ki Wena Linzwi lani, fa cwale lutaha ku Wena ka busepahali luli kasamulaho wa katalusa pono. Kuli, Mulimu, Wa ni pakela kuli

yeo ki niti. Mulena Jesu, Ni lapela kuli Utoze manzwi busihu bo kwa kuutwa kwa zebe ifi kaufela yeli mwataswa muhuwo wa Bumulimu. Mi haiba kuna ni babañwi mo, kamba ba basweli ku lu teeleza, kwande mwahala naha, haiba ha ba si ka itukisa ni kuba kapili fa hola ya ku kopana kwa kuli li kopane ni ze lwanisa za hola ye, Liñusa lelizwa ku Mulimu, ku baka ni ku itukisa, kakuli Mubuso wa Mulimu ufa kaufi. Lu lapela kuli cube cwalo, busihu bo, ka bona, kuli ba kopane ni butata bwa hola ye.

<sup>40</sup> O Mulimu, Na ba lapelela kwatuso, ka kuziba musebezi ni seo u talusa, ni ka se Ni swanelia ku alaba ka Lizazi la Katulo, ka ze Ni bulela kwanu kaufela kamba kokuñwi. Ni tuse kuli ni sepahale ka kufelelela, Mulena, ka se Ni eza kaufela kamba kubulela ka Linzwi la Hao, kuli sitise miselo. Kakuli, sina tumo ya Hao hane ili kuli, “Linzwi le lisike la kauhana ni mulomo wa hao; kono unahane ka lona, musihali ni busihu, kuli utokomele kueza lika kaufela ze ñozwi mwa mulao. Mi kihona uka kondisa muzamao ya hao, mi ukaba ni libubo lelinde. Kana ha ki Na ni ku laezi nji? U tiye mi ube ni pilu tata, kakuli Mulena Mulimu wa hao una ni wena kaufela ko u kaya.” Mulena Jesu, peta ona cwalo, busihu bwa kacenu. Lu lapela ka Libizo la Jesu. Amen.

<sup>41</sup> Labufaifi ni Pelekelo, kuzwa ka teni kuisa ka twelufu, fa tabernakele fa 8 ni Penn Street, kukaba litaelo, likalabo kwa tuto, litapelo za bakuli, ni zeñwi kaufela. Mutahe teñi kwani haiba muna ni puzo kaufela, kaufela se mutokwa. Ku kaba baana kwani baba ka—baka bona zeo. Mulena ami fuyole.

<sup>42</sup> Cwale, ka sebelezo ya ku kwalula ya busihu bo ye, hakuna se Ni kona kueza kwanda ku kwalula fela kapili mwa Liñusa la luna. Sani kona se lu bezi teñi mo, mi cwale kona se Ni kutezi kwanu.

Mi la Sunda kakusasana, haiba Mulena alata, Ni bata ku kopana ni taba tuna ya likangate la kacenu, ka za *Linyalo Ni Telekano*.

<sup>43</sup> Cwale, mwa Magalata 4:27, Ni tabela kubala Manzwi a, 4:27 kuisa 31, hamoho.

*Kakuli ku ñozwi kuli, Uwabelwe, wena mumba ya sa pepi; ululueze u huwe, wena ya si ka ziba lupepo: kakuli bana ba ya tuhezwi baka fita kwa buñata bana ba ya nyezwi.*

*Cwale luna, bana bahesu, sina Isaka mwa na inezi, lu bana ba sepiso.*

*Kono sina nako yani yena ya pepilwe ka nama a nyandisa ya pepilwe ka Moya, kusali cwalo ni ka nako ye.*

*Kono liñolo li liñi? Li li lelekisa muzike ni mwana hae: kakuli mwana muzike hana kuca sanda hamoho ni mwana wa ya lukuluhile.*

*Ki fohe, banabahesu, ha lu bana ba muzike, kono lu bana ba ya lukuluhile.*

<sup>44</sup> Mulena aekeze limbuyoti za Hae kwa palo ya Linzwi la Hae. Cwale, Ni lumela kuli fa Ni nga tuto sina cwana, ye ipitezi luli, mwa mufuta wa yona. Kono fokuñwi lu fumana Mulimu mwa lika ze ipitezi zani, lihola ze ipitezi, linzila ze ipitezi, lika ze ipitezi, kakuli Mulimu ki ya ipitezi. Mi bao baba Mu lapela ka niti kuzwa mwa lipilu za bona, ba Mu sebeleza mwa nzila ye ipitezi, kwa lika kamba linzila za lifasi. Tuto ye i bizwa kuli: *Peu Haina Sanda Hamoho Ni Sikapi*.

<sup>45</sup> Paulusi fa u ambola ka peu ye zibahala ya bana bababeli ba bashimani ba Abrahama. Paulusi, ka tabo, uipeya ili yena mwa siyemo sa kupepwa ka musali wa ya lukuluhile.

<sup>46</sup> Cwale, lu ziba kuli Abrahama nana ni bana bababeli ba bashimani, ka basali bababeli baba shutani. Mulimu na mufile sepiso ku Sarah, ka Sarah, nitaluse, kuli ku kaba Mwana wa mushimani yana ka pepwa, ni ka kufitela ku Mwana mushimani yo lifasi ne li ka fuyolwa. Linaha kaufela ne li ka fuyolwa ka Mwana mushimani yoo. Mi ki nto ye lumelwa ki babañata, sihulu mwahala Majuda, kuli neli Isaka, kono ne si yena. Yena Mwana mushimani wa sepiso yo wa Abrahama ki Jesu, mi ki Yena yeli Peu ya Silena ya sepiso, ya Abrahama. Kono Abrahama kakuba ni bana ba bashimani bababeli . . .

<sup>47</sup> Alimuñwi, ka—ka Hagare, ya nali mubeleki ku Sarah; ya latiwa, yomunde, mubeleki wa mu Egepita yo Abrahama na ilo mu batela mwa Egepita, kuli abe wa . . . musebezi ku musala hae. Mi Sarah, ka ku nahana kuli Mulimu nasike a buluka sepiso ya Hae kuba ya niti, a bulelala Abrahama kuli ange Hagare, mubeleki wa hae, mi amu nyale, (kakuli, libali mwa mazazi ani ne li lumelezwa) ni kuli apepe mwana; mi yani kona nzila yeo Mulimu na hupuzi ka yona, kuli na lukela kuba ni mwana fela ka Hagare. Kono lu fumana kuli sani ne si cwalo.

<sup>48</sup> Cwale lu utwisia kuli, hape, Mulimu u petehile mwa bulalu. Cwale, Mulimu u “petahala” mwa *bulalu*. “Muhau” ki *ketalizoho*. *Supile* ki “kufeleleza,” sina lifasi.

Mulimu u petahala ka Ndate, Mwana, Moya o Kenile. Kwani kona kupetahala kwa toho ya Bumulimu. Kaufela ki Mulimu alimuñwi, mwa liponahazo zetalu, za milelo ye milalu, kamba liofisi zetalu mwa toho iliñwi ya Bumulimu.

<sup>49</sup> Cwale, kunani hape zetalu mwa bupetehi, ka mihato ya muhau, kukena mwa Keleke; kutapiswa, kukeniswa, kolobezo ya Moya o Kenile. Zeo lilwala Kupepwa Sinca, inge fela mwa kupepwa ka nama ku swana ni zona. Kakuli, musali ha pepa mwana, sika sapili se si zwanga ki mezi, mali, mi kona kutatama bupilo.

Bibele ibulezi cwana, mwa Joani Wapili 5:7, kamba 7:5, Na sepa ki yona, ye bulela kuli, “Kuna ni zetalu ze paka mwa

Lihalimu; ki Ndate, ki Linzwi,” ya nali yena Mwana, “ni Moya o Kenile; zetalu ze ki nto Iliñwi. Kuna ni zetalu ze paka mwa lifasi,” ki Linzwi, “kifo mezi, mali, ni Moya. Mezi, mali, ni Moya; zetalu ze li *lumelelana* mwa nto iliñwi.”

<sup>50</sup> Cwale, haili Ndate, Mwana, ni Moya o Kenile, ki nto Iliñwi. Haukonni kuba ni Ndate kusina kuba ni Mwana; haukonni kuba ni Mwana kusina kuba ni Moya o Kenile. Kono wa kona kuba ya lukile kusina kuba ya kenisizwe; wa kona kuba ya kenisizwe kusina kutala Moya o Kenile. Lu pakile zeo mwa buino bwa ze bupilwe.

<sup>51</sup> Cwale, mi buñata bwa mina, mwendi, Ni kona kuba muenyi ku mina. Mi Ni—Ni tokwile tuto; Na ziba kuli mwa li ziba hande. Kono Ni lutanga ka mifuta, sina za nama ha li tamahana ni za moya.

<sup>52</sup> Cwale, lubona kuli kuna ni zetalu mwa bupetehi. Mulimu upetahala mwa bulalu, cwale. Mi sani neli, mwa kupetahala kwa peu ya Abrahama, nekuna ni Ishimaele, Isaka, Jesu. Ishimaele yana zwile ku musali wa muzike, Isaka na zwa ku musali ya lukuluhile, mi sibeli sa bona neli ka kusomana; kono Kreste Jesu na tahile ka mwalyanjo, kusina kusomana.

<sup>53</sup> Fa, yona “Peu,” iliñwi, Peu iliñwi; isiñi lipeu, kono Peu iliñwi. Babañwi ba ne ba si peu ya Abrahama, kakuli “Peu” ya Abrahama neli Peu ya tumelo yeo Mulimu na ambola ka yona, isiñi peu ya hae ya hae ya nama. Kakuli, kasamulaho wa Sarah kuswha, Abrahama na nyezi musali usili mi apepa bana baba supile ba bashimani, lu sa bali basizana. Kacwalo ne i sike ya ba lipeu za Abrahama, neli “Peu” ya Abrahama, iliñwi. Mi yani neli Peu ya tumelo ya Abrahama, kusupeza kwa Peu ya Silena yene lukela kutaha ka tumelo Abrahama; isiñi bupilo bwa Abrahama bwa nama, kono bupilo bwa moya bwa Abrahama; yana ngile lika kaufela kushutana ni Linzwi la Mulimu ni ku li biza kuli inge ne li si cwalo, mi alumela ku Mulimu; ku shutana ni sepo, alumela mwa sepo. Yani kona Peu ya niti ye lu bulela ka yona.

<sup>54</sup> Fa lu talimana ni siswaniso se. Oh! Peu ne i kalile, peu ya sepiso ya kalisa ka ku kakanyiwa hanyinyani, ku kakanya sepiso ya niti. Mwabona mo i kalezi ka bunyinyani, mwa ku kakanya sepiso ya pili. Mulimu na sepisize Abrahama, kuya ka Sarah, kuli abe ni mwana yo. Kono cwale mutualime, peu ya pili ya Abrahama ka musali wa muzike ne itile ka Sarah hana kakanyize kuli se si si kesa ezahala, kakuli na supezi mi na fitelezi siyemo sa kupepa.

<sup>55</sup> Cwale cwalo kona keleke mo ikalelanga. Cwalo kona mo ikalelanga kamita. Mu kalela kwatasi. Ha mu kaleli kwa halimu. Mutu ha pahama manela, ha lika ku kalela fahalimu pili, uka lobeha mulala. Mu lukela ku kala ni kuyaha kupahama kuyofita fani.

Mi fa lu fumana makalelo a sepiso ya Mulimu a i ponahaza, kutaha nyana ka mukwa wa kukakanya, ku lyanganisa tukiso ya Mulimu.

<sup>56</sup> Yani kona nzila yeswana ni sibi mone si kenezi mwa simu ya Edeni. Kona mo ne likalezi lifu ka sibi, neli fani Linzwi lililiñwi la Mulimu hane li lyanganisizwe kamba ku kakanyiwa. Hamukoni ku shimbulula Linzwi lililiñwi la Mulimu, sani KISONA SA BULELA MULENA, kakuli Ki Linzwi kaufela kuba cwalo.

<sup>57</sup> Mi fa Sarah, nihaiba ku yo sepiso (Sarah kakuba musali, yeli mufuta wa keleke), ne li tisize kukakanya kwa tukiso ya niti Linzwi la Mulimu la sepiso, mi ali, "Wena, Abrahama, muuna ka, ikungele mubeleki yomunde yo, mi upile ni yena, mi ube muuna hae. Mi Mulimu uka kufa peu yeo ka yena, mi Ni ka nga mwana." Mwabona, ka kufitelela fela katowati kalikañwi, ne ku cincize buino bwa tukiso kaufela.

Kabakaleo, lu lukela kunga Linzwi la Mulimu kaufela kuli KISONA SA BULELA MULENA. Linzwi la Mulimu kaufela ki la niti.

<sup>58</sup> Fa cwale peu ikala ka sepiso, ku kakanyiwa nyana. Isaka kauba peu ya musali ya lukuluuhile mi ili ya sepisizwe, apepa, sina Paulusi hana lika kutalusa mo mwa Magalata, na pepile wa nama, peu ya sepiso. Mi uwelapili kubulela fa kuli—kuli bana ba musali wa muzike haba koni kuba sanda hamoho ni bana ba musali ya lukuluuhile, kakuli ki ba mifuta yeshutana.

<sup>59</sup> Mi, yani ki niti, ya sa lumeli hakoni kuba ni mulumeli. Hakuna mukwa, ni hanyinyani. Fani kona fokuna ni butata kacenu. Hamukoni kueza kuli kuhu ya kopano ilumele ni mbande. Hamukoni fela kueza cwalo. Fani kona fo ku zwelela butata. Mu lukela ku lumela Linzwi la Mulimu kaufela. Fela muswanela... Ha mu ci sanda hamoho. Kamba nihaiba kuli mu—mu ikopanye ku sona; hamukoni kueza cwalo. Mu kaba mbande kamba kuhu.

<sup>60</sup> Na si ke kuca sanda ni Ishimaele, yena peu ya musali wa muzike, ili yani... ka bakeñisa ku kakanya. Sarah na kakanyize Linzwi la Mulimu, la kuli Mulimu na ka Li buluka. Mulemuhe Abrahama! Mwabona se Ni sweli kuyahela la Sunda kakusasana. Abrahama na si li ka kakanya. Sarah na li kakanyize; nali yena. Ne si Adama yana kakanyize; neli Eva yana li kakanyize. Kacwalo, he, luka fumana zeñata ka zeo ha lu ka li kutela la Sunda kakusasana.

<sup>61</sup> Mane nihaiba za moya halikoni... za nama halikoni kuca sanda ni za moya. Nihaiba bana ba Ishimaele ha bakoni kuca sanda ni—ni bana ba Isaka, mi hape za butu halikoni kuca sanda hamoho ni za moya.

<sup>62</sup> Keleke ya nama; Keleke ya moya. Kuna ni keleke ya nama yeo basali ba kwanu ba swanisisa; mi kuna ni Keleke ya moya,

hape. Kacwalo, keleke ya nama ni Keleke ya moya halikoni kuca sanda hamoho. Ki zepeli ze shutana zeo, linako ze shutuna; zepeli zeo za shutana, ki batu baba shutani; mwatasa kushutana, kwa bulikani bo bu kauhani.

<sup>63</sup> Lani kona libaka Kuungelwa hakuli ko ku shutana, mi ikaba fela kwa Peu ya Abrahama. Haikoni kutaha ka nama, keleke ya peu ya nama. Ilukela kuba Peu ya silena ya Linzwi La Mulimu, kuya ka Abrahama, yona Peu ya silena. Ki kabakaleo Kuungelwa ku lukela ku ezahala pili.

Kakuli, muhupule, “Luna ba bapila mi lusiyala haluna ku laka, kutibela bani ba balobezi. Kakuli tolombita ya Mulimu i ka lila, baba shwile ku Kreste ki ha ba ka zuha pili. Luna ba bapila mi lusiyala luka ngelwa ni bona, hamoho, mi lu katanyeza Mulena luna mwa mbyumbayulu.” Mulemuhe, mi hape ku ñozwi kuli, “Mi bafu baba siyezi habana kupila, ka myaha ye sikit.”

<sup>64</sup> Kabakaleo, fani, habana kuca sanda hamoho. Habana kuba mwa Kuungelwa hamoho. Kuna ni keleke ya nama kaniti, ni Keleke ya moya; keleke ya nama, ni Keleke ya moya. Mi, mwabona, fa hakuna kuli . . .

<sup>65</sup> Hakuna Katulo ku ba silena, ba moya, yona Peu ye sepisizwe ya Abrahama, kakuli ba lelezwi kwa Bupilo Bobusafeli. Ba amuhezi Sitabelo sa Mulimu se si lukisizwe; mi Sitabelo sani, yeneli Kreste, yena Linzwi.

“Mi kacwalo hakusana cwale katulo.” Muñoli Joani 5:24, haiba mubata Liñolo. “Cwale hakusana katulo ku baba li ku Kreste Jesu,” Maroma 8:1, “baba sa zamayi ka nama, kono ki ka Moya,” mwa Maroma. 5:24, “Ya utwa Linzwi la Ka,” linzwi la foo kikuli, “kuutwsisa.” Munwi wa bucwala kaufela, sika sesiñwi kaufela, wa kona ku Li utwa ni kuikela kusili. “Kono yena ya utwa Linzwi la Ka, kutwisisa Linzwi la Ka, mi alumela ku Ya Ni lumile, una ni Bupilo bwa kamita, mi hana kutaha mwa Katulo; kono usa zwile kwa lifu ukeni mwa Bupilo.” Eeni, sha.

Yena yo kunutu yetuna ya Mulimu i zibahalezi ku yena, ya utwisisa, kuli mane Mulimu nali ku Kreste inza kutisana Iliyena kwa lifasi, kuli mane Yena ni Ndate nebali Alimuñwi, kuli mane likunutu zetuna za ku talelezwa kwa Mulimu kunga ni ku itisa Iliyena, ku bonahalezi mwa lusika lwa libupiwa za batu, mi mwa ku ikalelwia kwa batu, ni mwa silikani sa libupiwa za batu; kuli aeze Linzwi la Hae ku bonahala mwa lizazi, mwa kupazula kwa lizazi kwa upa, ni kueza taba yeswana kwa ku likela kwa lizazi kwa wiko, kuli aekeze Iliyena ku bonahala mwa Keleke ya Munyaliwa, Linzwi leli bonahalile. Mwabona? Likaba cwalo, ni lona. “Yena ya utwisisa,” fo kikuli, “ku ziba, li patuluzwi ku yena, ku Yena ya Ni lumile, una ni Bupilo bwa kamita, mi hana kutaha mwa Katulo; kono u sa zwile kwa lifu kukena mwa Bupilo.”

<sup>66</sup> Peu ya nama neli fela sishimbelo sa ya moya, yona Peu. Inge lutaka, sibunga, ni sikapi. Lu fitile ku zani sapili, mwa Liñusa leliñwi, koni Ni tabela ku fituluka hanyinyani, ku lona, kamba kukutela ku lona hape fa muzuzu fela.

<sup>67</sup> Cwale ki ze fa likalulo zetalu za peu, ze lu bonisa siswaniso sa niti, likalulo zetalu za peu ya nama mwa mubu. Sina peu ha i calwa, itisa lutaka, lituhela ze nyinyani za comoha ku yona; kona kutaha sibunga, mi kipeto muuku wa mununo u wela ku yona; mi kutaha cwale sikapi; mi kipeto seli peu hape.

<sup>68</sup> Mutualime likalulo za nguli ye petehile fa, ni mo li belekela hande mwa mufuta, kakuli Mulimu ki yena Mukalisi wa ze bupilwe kaufela. Kabakaleo ze bupilwe halikoni ku palelwa sina Mulimu hasakoni ku palelwa, kakuli Nali Yena ya Na tomile lika mwa buino bwa zona kuli–kuli lu talime mi lu bone.

<sup>69</sup> Mulemuhe Hagare, lutaka, yeneli makalelo a pili a Peu yene i shoshela. Cwale, ne isa bonahali mane inge Peu. Neli lutaka, kakuli nali musali wa muzike, isiñi mwa sepiso ni hanyinyani; hakuna sa kueza ka Linzwi, ki sishimbelo fela sa Peu.

<sup>70</sup> Mulemuhe Sarah, sibunga sene si na ni muuku wa mununo, naha ya Sijuda yani neitile ka yena. Kutaha, i zwile ku Sarah, a pepa Isaka; ka Isaka, a pepa Jakobo; Jakobo a pepa mapatriareka; mi ka mapatriareka, kwataha naha.

<sup>71</sup> Maria, ka kupepwa kwa bwalanjo, kwataha Peu ya niti, ya Linzwi la moya ye ezizwe nama. Mwabona?

Basali babalalu, basali babalalu bao Peu ye ne lwezwi ka bona. Alimuñwi wa bona kaniti neli ka boozwa, mwatasa libali; wa bubeli neli musali ya lukuluhile; mi wa bulalu na sina kutwano ya kuziba muuna ni hanyinyani, kono ka tumelo a lumela Linzwi la Mulimu. Hagare, Sarah, bababeli cwalo bo Sarah ni Hagare, neli ka boozwa; kono Maria neli mwalyanjo, ka sepiso ya mata a Linzwi la Mulimu. Yani ki niti.

<sup>72</sup> Lutaka, Hagare (bafumahali bababeli), neba kakanyize sepiso, kono mutualime sene si tisizwe ki sani. Fani Hagare, musala Abrahama wa bubeli, ya nali fela musali wa nyazi, kono ato pepa muuna, kono (nali muuna wa mufuta mañi?) Bibele ibulezi kuli neli muuna “ya wa mwa naheñi.” Na pila ka buta bwa hae, mi hakuna mutu yana mu koma. Na sakonahali ku tapiswa, na sa cincawi, yasa konahali ku fetulwa. Na sa konahali kutapiswa. Nali muuna wa mishitu, kakuli na shutana ni Linzwi la Mulimu.

Mi sika kaufela se si shutana; mukutazi ufi kaufela, membala ufi kaufela, keleke ifi kaufela, ye shutana ni Linzwi la Mulimu; ika pepa sikuwata sa bu lifasi, sa Hollywood, mi haikoni kuina ni Linzwi le li si ka zwakiwa, kakuli ha li sika beiwa nihaiba mwa sepiso. Batili.

<sup>73</sup> Sarah, yena musali wa niti wa sepiso, kakuba sibunga, a pepa mwana mushimani. Ka ku kutisa, a pepa naha ya sepiso yene sebeleza Mulimu. [Hakuna manzwi fa tepu—Mu.]

Kono, Maria, kusina kusomana ni hanyinyani, kono a lumela Linzwi la sepiso; fani hanali mwalyanjo, a sa zibi nihaiba muuna. Mi Lingeloi la Mulena la mu katanyeza, ali, “Lumela, Maria, ufilwe mbuyoti mwahala basali, kakuli Mulimu una ni wena.”

<sup>74</sup> Mi musali ali, “Lika ze lika konahala cwani?” Yena... Musali abulela.

<sup>75</sup> Lingeloi la bulela kuli, “Moya o Kenile uka ku ukama.”

<sup>76</sup> Ne ku sika ezahala kale mwahala masika kaufela, kono Maria na lumezi Mulimu. Mi ki hali, “Bona mutanga Mulena.” Na lumezi Linzwi.

Kana ukaba cwani ni yena? Na zibile kuli Hagare nana ni mbututu ka takazo ya kusomana, ni Abrahama; mi Sarah nabile ni mbututu ka takazo ya kusomana, ni Abrahama, bana ba sepiso; musali wa muzike ni musali ya lukuluuhile. Kono fa ukupiwa kuli a lumele. Yani kona kekezo kwa tumelo yeneli ku Abrahama, yana lumezi ku ze sa konahali, “Haibile ki Mulimu ya na bulezi cwalo, sani sa kondisa lika.”

<sup>77</sup> Na lumezi Mulimu, na si ka buza. Na bulezi kuli, “Bona mutanga Mulena. Hakuna taba kamba nekuna ni kañi yekuma kai ye Ni lukela kuutwa kwa lifasi, kube ku na kuya ka Linzwi la Hao.” Nekutile Peu ya niti.

<sup>78</sup> Sarah na si ka eza cwalo, kakuli neli kusomana. Yeo ki niti. Mane ni yena Sarah na si ka eza sani, kakuli neli kusomana.

Nihaiba keleke haikoni, mwatasa saluluti yetuna ya kuiketa! Si lwala tumelo ya bwalyanjo mwa Linzwi la Mulimu fa kuba ni sepiso, kuli kupepwe bana. Kuiketa kwa saluluti hakuna kupepa Keleke sincia. Haku koni kuba cwalo. Ku ka pepa ku yolisa sesiñwi. Si ka pepa nto isili, ye ka likanyisa fela Sani, sesiñwi se si lika kuba sina Lona.

Kono Keleke ya niti, ya Mulimu ye pepilwe sincia i lumela Linzwi la Mulimu fapila sika kaufela, hakuna taba kamba ki sikamañi, kakuli halisika zwakiwa. Ki ka sepiso ya Mulimu lika ze ha linze litaha cwalo.

<sup>79</sup> Maria, yena wa niti, ali, ka ona . . . . . -kusina kukopana, ali, “Kube kuna kuya ka Linzwi la Hao. Bona mutanga Hao!”

Mi ki ha pepa. Ki sikamañi sa na pepile? Ne si muuna wa mishitu; ne si naha. Kono na pepile Linzwi, Mulimu Yena lulii kubonahala mwa nama; amen, yona Peu ya niti ya Mulimu ne ibonahalize sepiso kaufela yeo Mulimu na file mwa Bibele; kusina Yena, hakuna mutu yakona kupila kusina Yena.

<sup>80</sup> Nali yena peu ya niti, na li kwa buse a ta- . . . nali sikapi sene si lwezi Buloto. Cwale, zepeli zani neli fela lishimbelo za

Bupilo, kakuba fela peu ya nama. Maria . . . Cwale, muhupule, Ne ni bulezi kuli zepeli . . . Cwale, Maria, ha si mu ezi kuba Mulimu, sina batu babañwi mo ba likela ku mu ezeza. Na si mulimu. Batili, sha. Nali fela mulwali wa Peu, sina babañwi ba bona mo ne ba inez; kono, inge tumelo mwa Linzwi, itisa hahulu ku to ba sibupiwa sa niti.

<sup>81</sup> Inge mbonyi mo i hulela, kamba buloto. Bwa taha cwalo, ka lutaka; mi kipeto ya taha cwalo, muuku wa mununo; mi kipeto ya taha cwalo, ka sikapi. Kono cwale ha mu nahana, sikapi sani, haiba ha mu lemuhi, si ka bonahala mane inge buloto bwa niti. Kono ha se si apuhile, buloto bwa niti bu mwahali. Sona ki sikapi fela, hape.

<sup>82</sup> Kacwalo, mwa bona, Maria, isiñi ka kusomana, kono kuya ka tumelo; sesiñwi se si bonahala mane inge Yona. Maria ne si yena Peu yani. Maria nali fela sishimbelo sa Peu.

Nali wa niti, Peu ya tumelo, kakuli Linzwi la Mulimu ki ka tumelo ha Na li file ku Abrahama. Mi ki tumelo fela yekona kutahisa seo Mulimu na bulezi kuli Uka eza; tumelo mwa Linzwi la Hae.

<sup>83</sup> Mulemuhe kuli mane kuswana sina Sika sa niti, Maria nali cwalo, kono si swana ni sikapi. Sikapi si swalana ni peu mwahala sona mi sa i bukeleza, ni ku ibabalela kufitela iyema hande inosi, kuhula. Kona mo lu bezi ni lusika lwa keleke ye (ya Pentekota) i hulile, si swala Bubeke bo kufitela iba nako ya ku kwalula sikapi. Maria, kakuba mahe Kreste, neli fela sifutumaliso.

Na si mali a Maria; Na si mali a Mujuda; Na si mali a Bamacaba. Na li Mali a Mulimu. Ki Mulimu ya na bupile Mali a. Ne isike yana ka ku kopana. Na si Mujuda kamba wa Bamacaba.

<sup>84</sup> Mbututu ha ki siemba nihaiba silisiñwi sa mali a bomaha. Mali azwelelanga ku ndate. Lwa ziba mata a mali kuli afumaneha ku muuna.

Inge kuhu, ya kona kubeya lii, nasikuku ya kona; kono haiba yali kuba i kopane ni ya muuna, mukombwe, haina ku ndondola. Halina mununo, ni ha lika bonahala ona cwalo inge lii le lina ni mununo. Sibupeho sa lona kaufela si bonahala kuswana, kono halina bupilo mwahala lona.

<sup>85</sup> Kona mo kuinezi kwa batu baba bulela za Kreste. Buñata bwa bona ba bonahala inge Bakreste, balika kueza inge Bakreste; kono u lukela kuba ni Kreste mwahala hao, ili Linzwi le li bonahalile, kusicwalo haina kuhula kuba Mukreste wa niti ya lumela mwa Bibebe. Ikaba i bangä kopano ya sesiñwi kamita. Haikoni kupila, kakuli hakuna Bupilo ku yona, kuli ipile.

Lii halikoni ku ndondola, lika bolela mwa siyaleto, haiba ne isikaba ni—ni nyunywani ya muuna.

<sup>86</sup> Kuswana fela sina ma membala ba keleke. Mwa kona kuba kombelela ni ku ba biza, kuba eza madikoni ni zeñwi kaufela,

kono ba ka . . . mukaba ni siyaleto se sitezi mai a bolile haiba ha si ka kopana ni ya Muuna. Yeo ki niti.

<sup>87</sup> Sishimbelo, sikapi, ne si I hulisize. Yeo ki niti. Mi Iba, sani ki kuli, yona Peu Kasibili, ina ni kusiya sikapi, kamba sikapi sina ni kusiya Peu, kuli Peu ibe fa Pila Mwana, kuli I kone kubuzwa. Kaufela li mwa mufuta, lwa bona.

<sup>88</sup> Mubone fa cwale mwa bezi bukaufi musali yo, yona keleke ya mazazi a maungulo a, i bonahala inge Peu yona luli Kasibili. Mutualime ka mo kopano ya Pentekota ye tile mwa mazazi a maungulo a, mi luka i tatulula kasamulaho nyana, mwabona, mo litela hamoho bukaufi kuli i bonahala mane inge kona Peu.

Mi sikapi ha si taha kuzwa kwa bubeke bwa buloto . . . kamba siemba sa buloto, kasamulaho wa muuku wa mununo uwela fani mwa kalulo ya bubeli, mi sitisa kalulo ya bulalu yeli sona—sona—sona sikapi. Mi mane kuli . . . Haiba ha u talimisisi hande ka tokomelo, hauna ku kona kuziba bubeke bwa niti bwa buloto mwani. Fani bubeke bo bu nyinyani bwani hane butile, ku bonahala inge bubeke, kono ha uka inafafasi ni ku batisisa uka fumana kuli hakuna bubeke mwateni ni hanyinyani. Ki sikapi fela, sishimbelo sa bubeke. Cwale, bubeke butaha ku zwelela ku sani. Kono muhupule, hakusana zeñwi hape kasamulaho wa sikapi sani.

Muhupule, nekusina Peu yeñwi yene sepisizwe kuya ka musali yani, kai ni kai, kasamulaho wa Maria. Mi hakusana hape kopano ye sepisizwe kasamulaho wa Pentekota. Ki Kuungelwa ni Munyaliwa ko kutaha kuzwa fani, yona Peu, ki Linzwi le li bonahalile hape.

<sup>89</sup> Mulemuhe, mutualime mo li bonahalela fa kaufi. Mateu uli, Muñoli Mateu 24:24, ili, cwana, “Mioya yemibeli mwa mazazi a maungulo,” moyo wa keleke wa batu ba keleke, ni Moya wa Munyaliwa wa batu ba Munyaliwa, “ikaba fa kaufi hahulu kufitela mane ipuma ni bona ba Baketilwe haiba ku konahala.” Cwalo kona mo libezi fa kaufi.

<sup>90</sup> Mutualime mo itezi ka lutaka. Cwale mulemuhe, lu ka swanisisa sesiñwi fa.

Luther, mwa lusika lwa keleke, ka kutisa Peu ya Munyaliwa, neli Moya o swana. Lubeke lu lilumu fela lwa Peu, Luther na yemi cwalo, yani neli ka kubeiwa baba lukile ka tumelo. Na lie yena mufuta wa Hagare, lona lutaka.

Mulemuhe, Wesley nali mufuta wa Sarah, mwa Philadelphia, lusika lwa lilato lene li tisize sibunga. Kuli mwa lusika lwa Wesley, ne ku nani balumiwa babañata hahulu kufita mwa lusika lusili kaufela lo lukile lwa ba ni lona, lusika lolutuna lwa balumiwa lwa nako ya John Wesley.

<sup>91</sup> Kono Pentekota ne i yemela Maria. Maria, kalulo ya mafelelezo ya Teni, cwale, na si yena Peu. Ibo, Bupilo bwa Peu ne

buli ku yena, kono ne I si ka hula kale. Ni ikutwa hahulu kuba wa bulapeli. Babañata ne ba nani peu, kono, mwabona, ne I si ka hula kale. Neili teni, kono ne I si ka hula.

Kona mo kuinezi ni lusika lwa luna lwa Pentekota lo lupila ku lona! Kuna ni kutaha li—li Linzwi la Mulimu la mwahali, le li sina kopano, kwanda likwenda za kopano yani.

<sup>92</sup> Luther nailo apesa ka linzwi la hae la makalelo, “Ba balukile ba ka pila ka tumelo.” Wesley nana ni manzwi amabeli, “kukeniswa,” musebezi wa bubeli wa muhau. Pentekota neina ni linzwi la bulalu, “ku kutisezwa kwa limpo.” Kono Peu ka kutala ina ni kutaha! Mubone mo ne ba i kopanela fa linzwi lililiñwi, ni linzwi leliñwi, ni linzwi leliñwi?

Kono ku lukela kuba Sesin̄wi se si sakoni ku kopanyiwa; ki mutalelela wa Bupilo bo buli mwani, ina ni ku itahisa Ili yona hape ku Munyaliwa. Ha kukoni kuba masika a keleke kasamulaho wa lo. Lu kwa mafelelezo, mizwale ni likezeli. Ki luna ba fa. Lu fitile. Ku lumbwe Mulimu! Amen. Cwale, lubona lika ze kuli ki za niti fela ka mo lu kona kubela.

<sup>93</sup> Niteni lu sa lemuha, cwale, haiba yena kakuba sibunga, kamba . . . Wesley kakuba sibunga; Pentekota konakuli kakuba sikapi, yeli lusika lo lutatama lwa kutaha kwa Bubeke. Kono, muzwale, kezeli, lutaka hakona Bubeke, kamba mane nihaiba sona sibunga kuba Bubeke, nihaiba sona sikapi ha si koni kuba Bubeke; niteni, nako ni nako ha ihula, sibonahala fela mane inge Bubeke.

<sup>94</sup> Lutaka ha lu bonahalangi inge bubeke. Mi kutaha sikamañi mwateri? Sibunga, kaemba nyana kaka tuhela; ka bonahala mane inge bubeke kufita—kufita litali mo li bonahalela. Ki sikamañi se si tatama kasamulaho? Ki sikapi; si swala bubeke, si hulisa bubeke.

<sup>95</sup> Cwale mutualime kwa mulaho kwanu kwa sepiso yeo Mulimu nafile ku Abraham, kuli “Peu ya hao,” kubulela ka moyo. Yomumu wa luka kaufela wa ziba cwalo. Na bulela ka Kreste, isiñi Isaka; kuya ka Peu ya hae ya tumelo.

<sup>96</sup> Mulemuhe, wa pili neli ka musali wa muzike, na sa bonahali inge sepiso. Mulimu ha lukeli kuisa Linzwi la Hae ko ku sina mutu. Mulimu na bulezi mo ne li ka tela, mi yani kona nzila mo li tahela. Kono, Sarah, kakuba muyemeli wa keleke, mufuta wa keleke, na (yena) fumanwi kwande kwani, kuli na bulezi kuli, “Kihande, Ni lumela kuli ye ki taba ye ipitezi nyana hape. Mane hani koni fela ku lumela ku zona, konakuli ikungele Hagare mi uikungele yena kuba musala hao.” Mwabona, kwani, lutaka lwani ne lu sa bonahali inge sepiso, ni hanyinyani.

Kono cwale Sarah hanatile, cwale, sani ne si bonahalile hande luli. Ne si bonahalile hahulu inge sepiso fani, kono niteni ne si sepiso ya niti. Kakuli, Isilaele, ku Isaka, na palezwi ni kulatula Peu ya niti ha ne I tile. Haleluya! (Musike mwa taba;

musike mwa mata. Seo hasina ku mi holofaza.) Kulatula Peu, ba Mu kokotela, ni ku Mu paheka fa sifapahano!

<sup>97</sup> Kuswana fela sina Paulusi mwa na bulelezi fa, “Kana ha ki kuli—kuli peu ya—ya musali ya lukuluuhile . . . kamba musali wa muzike ne isika nyandisa Peu ya musali ya lukuluuhile?”

Mi ona cwalo kona mo i iezeza ni peu ya kopano inyandisa Bubeke bwa niti. Kamita ku lukela kubanga ona cwalo. Halina kuca sanda hamoho. Ha li swalisani hamoho. Ki lisepiso zepeli ze shutana, linako zepeli ze shutana, batu bababeli baba shutana, kaufela hamoho. Yomuñwi ki Munyaliwa, mi yomuñwi ki keleke. Hakuna kuswana, ni hanyinyani, ni bona.

<sup>98</sup> Kono niteni ha ki Peu ye ne sepisizwe kutaha. Kamba mane nihaiba yena Sarah, hakuna nihaiba . . . Mane ko kutockwa nihaiba Hagare, nihaiba yena Sarah na si cwalo, kamba—kamba nihaiba yena Maria, ne si yena Peu.

Maria ne si yena Peu. Na li sishimbelo sa Peu, kono na ibabalezi, apepa kuzwa mwa mba ya hae. Inge fela sikapi, mba ya hae ne ipeile Peu ya niti, kono sikapi ha ki yona Peu. Sona fela . . . Si sutelezi bukaufi ni Peu. Si swalani hande kupotoloha Peu.

Kwa mulaho wa lutaka, bupilo bu hasanezi mwa lutaka. Mi cwale haitaha kwa muuku wa mununo, ukubukana hamoho. Kono haitaha kwa sikapi, siteni kwani inge peu, mane sipangienda inge peu.

Jesu na lu bulelezi se ne si ka ezahala mwa lizazi la maungulo, “Likaba fa kaufi hahulu lika puma mane ni bona ba Baketilwe haiba ku konahala,” kono he Peu itaha ka kuzwelela mwani. Mi sikapi, Bupilo bu siya sikapi. Mi sikapi ki sishimbelo, mi sani kona se libile likopano za luna, ki sishimbelo; Luther, Wesley, Mapentekota. Mi cwale seli nako ya Peu kuli ibonahale. Mulemuhe, mulemuhe, fela . . .

<sup>99</sup> Na si yena Peu. Maria na si yena. Ki sikapi fela, sibunga, ni lutaka, ki lishimbelo za siemba sa Linzwi, ha ki Linzwi ka kakutala! Luther nana ni kuluka; Wesley nana ni ku keniswa; Mapentekota neba na ni limpo. Kono cwale Linzwi hane litile . . .

Cwale, ne ba ka eza zani, kuli, kuluka kwani ne ku ka pilisa mutu. Mwa lumela cwalo? Luli, neli sishimbelo sa Linzwi, ka kuswana fela sina ha Ni lumela lutaka kuli ki siemba sa buloto. Luli, ku cwalo, kono ki sishimbelo. Ha kona Bupilo.

Mi ki ha kutaha ku keniswa. Ki ba bakai ba balumela mwa ku keniswa? Mwa lumela mwa Bibele, mwa swanelia kueza cwalo. Luli. Niteni ha ki yona; ki nto yeswana fela hanyinyani; ani ki manzwi amabeli fela.

Kono cwale ki ha kutaha Pentekota, ku kutisiezwa kwa limpo. Kubulela ka malimi, ba ibiza kuli ki bupaki bwa makalelo bwa Moya o Kenile. Kubulela ka malimi, kwani, ba biza zani kuli

kona bupaki bwa makalelo, bo ne butisize (sikamañi?) sikapi, kono ne ba ikopanyize.

Kono ha mu ka bulela kuli, “Na ni Ndate Lu nto Iliñwi,” ni lika zeñwi ze, kona kuli sikapi sa apuha kwa Teni. Kono Keleke ya niti, ya Munyaliwa ika pepa Linzwi la Mulimu ka kutala, mwa mutalelela wa Lona ni mwa mata a Lona, kakuli Yena wa swana maabani, kacenu, ni kuyakuile.

Mulemuhe, mwa mba ya Maria ne kuna ni Peu.

<sup>100</sup> Kono cwale Peu hane itilo pepwa, Ne ibulezi kuli, “Ni tilo eza tato ya Ya Ni lumile. Na ni Ndate Lu nto iliñwi. Haiba ha Ni ezi misebezi ya Hae, musike mwa Ni lumela.” Yani neli Peu. “Ki mañi wa mina ya kona ku Ni nyaza ka kusalumela? Sene isepisize Bibele kuli Ni ka eza, Ni si ezize. Mulimu upakile sani ka Na,” Ki hali. “Ki mañi yakona ku Ni bulela cwale?” Mwabona?

Kono, haili—haili Peu ku Maria, sikapi, ne sili bukaufi kuli si be Sani, kono ne ku si cwalo. Ne isali mwa mba.

<sup>101</sup> Mulemuhe, mi mwa lusika lwa Pentekota. Kutaha ni mwa lusika lwa ba Lutheran, kutaha ni mwa lusika lwa ba Wesleyan, ibile taba yeswana ni kutaha mwa lusika lwa Pentekota lo.

Cwale mulemuhe. Kono ka kukwalula kwa Maswayo Asupa, Sinulo 201, Linzwi le litezi li lukela kupepwa mwa kuiponahaza hape, ni kupakiwa ka Moya wa Mulimu, mwa mata a tezi sina mo ne Li inezi fani ha Nali fa lifasi fa; kubonahala mwa nzila yeswana, inza li eza lika zeswana ze ne Li ezize hane Li li mwa lifasi le. Amen! Maheberu 13:8, iize, “Jesu Kreste ki ya swana maabani, kacenu, ni kuyakuile.”

Ku Muñoli Luka 17:30, Jesu naize, “Mwa mazazi a mafelelezo, sina mo ne kuinezi mwa mazazi a Sodoma, foo Mwana mutu ha ka ipatulula Iliyena hape, ikaba nto yeswana.”

<sup>102</sup> Lifasi li mwa buino bwa Sodoma. Mi ni keleke ikeni mwa Sodoma, ni lona, inge Lota ni musala hae.

Mi Ni bulela kuli kuna ni Keleke ye Ketilwe kokunwi mwa lifasi le, yesweli ku kauhana ni kuzwa mwa lika zani, mi ponahazo ya Mulimu i hohile ngana ya Yona. Lu mwa mazazi a maungulo.

<sup>103</sup> Sikapi sifile Mata a sona kwa Peu. Se izwezi fande; neli sikapi se sinde, kono si belekile nako ya sona. Mwabona, ki Munyaliwa wa Linzwi wa Munyali wa Linzwi!

<sup>104</sup> Peu ya nama ya Abrahama, ya Isaka, ni Jakobo, ni... Kamba, peu ya nama, nitaluse, ya Ishimaele, peu ya nama ya Isaka, ni zeñwi cwalo, neina ni kukena mwa mubu, fakuli i—i tahise yomuñwi yo, kutisa Jesu.

Mi ku cwalo ni kubabañwi ba kaufela, lipeu lina ni kuoma... Ni talusa, makapi ana ni kuoma, mi muuku wa

mununo ulukela kuoma, ni zeñwi lishwe, kuli Peu ikone kuitahisa Iliyona. Kona mo kubezi mwa lusika ni lusika.

<sup>105</sup> Likopano libile lishimbelo za siemba sa Lona, siemba sa lona Linzwi, kakuli Li patezwi ba ongaongi ba babutali, kamba ba... kuswaiwa kubona, kufitela lusika lwa Limbande lu bonahala. Bibebe ibulezi ona cwalo. Eeni, sha. Kakuli, lu sepisizwe seo mwa Malaki 4. Ona cwalo, lu sepisizwe.

“U Li patezi meto a ba babbtali ni ba ngana.”

<sup>106</sup> Sina halu sa zo fita fela mwa Buka ya Sinulo, lu fumana kuli kaufela, balumiwa babalalu kaufela ba libatana zani bene baile; yomuñwi ni yomuñwi na swana Luther handende, yomuñwi ni yomuñwi nainzi ku yomuñwi hande fela, ili komu ni lifolofolo zeshutana za Bibele; ne bakeni mwa kuluka, ku keniswa, mane nihaiba mwa Mapentekota. Kono ya bune neli mbande, yeo ki niti, mi kuya ka lusika lwani Mulimu na Lu nanuzi mwahalimu. Kacwalo ilukela kutaha ka lusika lwani kuli li luke, eeni, sha, sepiyo ya mbande inze i talelezwa ya—ya Malaki 4.

<sup>107</sup> Jesu na si wa Maria, kono natile ka Maria, inge Bupilo bo bu fitela mwa sikapi.

<sup>108</sup> Cwale, buñata bwa mina mizwale ya Katolika yeminde mo, kamba likezeli, busihu bo, mwendi mu nahana kuli Maria neli “mahe Mulimu,” sina mo mu bulelelanga kuto ki yena. Kana nakaba cwani mahe Mulimu, kanti Mulimu nasina makalelo ni mafelelezo? Mwabona? Ki mañi yanal Ndatahe Mulimu, cwale, haiba nji yena neli mahe? Mwabona?

Nali Mubupi wa hae, mi musali nasi mubupi wa Hae. Na ipupile, Iliyena, mwa mba ya Maria, isiñi sibupiwa sa hae tota. Neli Yena, yana ipupile, Iliyena. Na si wa siemba sa musali, kono musali neli wa siemba sa Hae. Yeo ki niti. Bibebe i luluta, kuli, “Like kamukana li ezizwe ka Yena,” mwabona, “mi hakuna se si bupilwe kwanda kuli si bupilwe ka Yena.” Konakuli Na ka kona cwani... Kana Na ka ba cwani ni mahe, kanti Neli Mulimu yena Kasibili?

<sup>109</sup> Mo lubonela fa sinulo ya niti ya mufuta wa niti. Kuna ni basali babalalu ba lishimbelo kwa peu ya nama, kufitela ha li to hula ku Jesu. Kuli mane Ishimaele na si ke kuba yena, kakuli na pepilwe, luli, ku sene lu ka nahana kacenu kuli, kwanda linyalo la likute, kakuli neli mwana mushimani wa musali wa muzike. Mi ataha ka kuswana inge Yena hanyinyani fela, sina Jesu, ili Isaka yana tile; kono niteni ne si yena, kakuli na pepilwe ka kukopana mwahala Sarah ni Abrahama. Kono cwale kwa nalulelule kwataha Maria, ka kupepwa kwa mwalyanjo, apepa Jesu Kreste. Yani ki niti. Mulimu, yena Linzwi, le li ezizwe nama.

<sup>110</sup> Cwale mutualime. Nekuna ni basali babalalu. Ki bani basali babalalu baba swanisiswa fa, likeleke. Basali kamita ba yemela likeleke. Kutalusa, masika amalalu a likopano, lishimbelo, ili ze lukela kushwa ni kuoma, inge fela sikapi ni zeñwi cwalo

mo li evezanga, ili kufa sibaka kwa Peu. Peu haikoni kuba hande, haikoni ku buzwa, nitaluse, konji pili sikapi, lutaka, ni matali, hase li omile kaufela. Yani ki niti. I anya Bupilo kaufela mwani, ku zona, kuzusa; amen; kaufela zene lili zona, kona zani, hamoho.

<sup>111</sup> Haikoni kueza sani! Cwale seli nako ya Peu, kamba nako ya Munyaliwa. Makapi a shwile. Makapi a omile. Nako ya Linzwi la mwalyanjo, ya si ka swaliwa fateni. Ki mwalyanjo, muhupule, nako ya Linzwi la mwalyanjo. Hane mu ka Li beya mwa mazoho a kopano, fo kipeto Halina kuba mwalyanjo; Ne I ka swaliwa ki mutu, ka nako ye mu yo fita ku Lona. Kono Keleke ya Mulimu ha iswaliwi ka kopano. Haleluya! Ki Linzwi la Mulimu le li pepilwe ki mwalyanjo le li bonahala, Jesu Kreste ya swana maabani, kacenu, ni kuyakuile. Haleluya! Cwani, ha ki bunde niboo! Na lata Sani. Na Si lumela. Ni ziba kuli Ki Niti. Halina ku swaliwa. Hakuna kuba mutu wa kopano ya ka swala Kupepwia kwa Munyaliwa kwa mwalyanjo. Batili, sha! Musali ki—musali u laezwi ki Mulimu kuzwa ku ze cwalo. “Usike wa swala ze masila za bona, kufetuha manoňu.”

<sup>112</sup> Si ni hupulisa fela. Hane Ni zwa kwa Phoenix zazi leliňwi, kutaha kwa Tucson, mwa mukopano, Moya wa Mulimu wa to ni bizeza ku sesiňwi; musala ka ni Na hane lusweli kuzamaya hamoho, lunze lu ambola, mi bana ne ba lobesi kwa mulaho mwa mota, ne se kuba busihu. A ni bizeza kwa maankoli, mi Na talima maankoli yani fa nako nyana ni ku balisia za yona. Ki mufuta luli wa keleke ya kacenu.

<sup>113</sup> Cwale, maankoli, sina kaufela luna ha luziba, i latehezwi ki zibahazo ya yona ya makalelo ya sibupeho sa yona. Yani ki niti luli. Ne iswana mbande ka nako yapili, ili muhulwana yona wa muzwale; maankoli neili cwalo. Kono cwale ha fufelangi mwa mbyumbyulu luli ni hanyinyani, kuli azume maana ya hae ya lihalimu, kono sa bile ya bunolo. Ha sa fufelanga mwa mbyumbyulu ni hanyinyani. U cuňutelangafafasi, inge linoňu; uina fa kota ya luwaile; inza tula tula fela, kuzuma tushakame to tu shwile. Maankoli na si ka bupiwa kueza sani. Batili, na bupilwe kuli abe ya swana ni mbande.

Cwale, zani liswana inge keleke. Ne ibupilwe kuswana ni mbande. I lukela kunga sibaka sa mwa Mbyumbyulu. Kono, mwa sikaba sa zeo, se ibile bunolo. Ha isa fufela mwa libaka ze sa zibwi nihanyinyani, mwa halimu halimu. Batili, sha. Se itingile mwa muzamao ye minca ya yona, ya kuikungela, za lituto, ni tuto ka za bulapeli, mwa kopano yeňwi yaipangezi mutu; inze ibata tushakame totu i shwezi, to tu bolile neku, seo mutu yomuňwi abile ni sona. Yani ki niti. Ku cuňuta ka lihutu lililiňwifafasi cwale, mwa bona, yani ki niti, kona maankoli. Mwabona, seo kona se si bulela.

Mbande ha isika cinca ni hanyinyani. Ipila ka kuba mbande.

<sup>114</sup> Yena ha lendangi hahulu mwa mbyumbyulu, maankoli hakoni, nihanyinyani, kuli aswale maana ya hae ye mezi mwahalimu mwani, kono uitingile ku sa kona kufumana se si shwile kale. Maankoli hakoni nihaiba...lu bulele kuli ulukela kubafafasi. Kono mutualime maankoli wa kale kacenu. Muye mushetumuka mwa mukwakwa, muka bona mihala wa luwaile itezi fela bo maankoli, kubona haiba uka ipumanela sika—sika se si shwile, sesiñwi cwalo se si bolile. Ha na mafufa a tiile kuli afufise. Ki... Taba yapili mwa ziba, uka wela fafasi, ona foo, ku to lapalala kakuli ubile bunolo. Ha itusisi mata a yona, hakusa konahala, ao Mulimu na ifile.

<sup>115</sup> Zibahazo ya yona yeipitezi neli kukena mwa mbyumbyulu ni kutalima fafasi, kono cwale itaha fafasi mi mane haikomi kutalima mwa halimu. I iselize muhupulo wa yona fa tushakame totushwile, ili kufumana se ikona kuipumanela mwa mukwakwa; mwendi sinyonde, cwalo, kamba sesiñwi sa hatile mutu. Yena ha ki mbande, kono uswana fela inge yona.

Kuswana fela inge keleke haitinga fa lico za yona ka lituto ni zeñwi cwalo, ni lico ze shwile kale lilimo kwa mulaho, kuya ka Luther, ni Wesley, ni Mapentekota, ni kuikela, ya icela. Italimela kwa mulaho kwa lituto zeñwi za litumelo za ipangezi mutu; mwa sibaka sakuli ifufele mwa Mbyumbyulu ka Linzwi, koo, “Lika kaufela li konahala kuba balumela.”

<sup>116</sup> Yena uswana mikwa ya sibungu. Ona lika ze shwile zani ne li siyezwi manoñu, ili lifasi. Lituto ni zeñwi zeswana sina cwalo, ne li siyalezi mwa lifasi, isiñi kwa Keleke. Ki ye bunolo hahulu haina... Ha i si ka pazauha ni hanyinyani. Haikoni kulenda mwahalimu mwa Mbyumbyulu, ili koo, “Lika kamukana li konahala ku ba balumela.”

Uina kwa mulaho, ni kubulela kuli, “Kihande, Dokota wa *Kuli-ni-kuli* ni yomuñwi... Kopano ya ka hai Li lumeli ka nzila yeo.” Oh, wena maankoli ya lyangani, yasaba kuhuwa ka lisepiso za Mulimu!

Mu li, “Kihande, mazazi a limakazo afelile.”

<sup>117</sup> U ya bunolo. U saba kunga mafufa a hao ni kufufela kwahule mwahalimu. Mi utaha ka kuba ya bunolo hahulu mwa mukopano wa litapelo? Kikuli utile fa sibaka sakuli wa sab kuina mizuzu ye lishumi kwa aletare?

<sup>118</sup> Kucuñuta cwalo inge linoñu, inza ca ze ishwezi ze shashize za mubu! Eeni, sha. Ki ya bunolo hahulu kuli apahame bupahamo bo butelele, ni hanyinyani. Ucuñuta sina linoñu, mi uca lico za manoñu. Kona seo sili sona. Yani ki niti. Kufitela, akala ku bonahala inge linoñu. U eza lika inge linoñu. Hasali maankoli ni hanyinyani. Yena sa swana inge linoñu kufita kuba maankoli. Maankoli uswanela ku kambama; isiñi kuina fa musumo wa luwaile ni kutalima talima kubona shakame ye shwile, mi kipeto

ya tuluka kwateni ni ku tula fahalimu nifafasi kuya mwa mukwakwa inge linoňu. Mwabona?

<sup>119</sup> Ona cwalo kona mo iezelize keleke kacenu. “Ki tuso maňi ya ku kambamela mwahalimu Mwani ni ku fufafufa, kanti Ni kona kuipumanela tushakame mo?” Kono tu shwile. Tu bolile. Tu shashize. Nako yeňwi, neli lika zende; kona mo ne kuinezi ni kwa tuto ya ba Lutheran, Wesley, ni Mapentekota. Kiňi ha uca inge linoňu? Nekuna ni maana yenca yene wa busihu ni busihu, kuzwa mwa mbyumbyulu, kwa bana ba Isilaele hane ba zamaya; zeňwi kaufela ze siyezi ne li shashize. Ne lu bulelanga kuli, mwa naħħa, “kuna ni mawili-wili mwateri” Kuna ni zeňata hahulu za mawili-wili mwa kutwisiso ya luna kacenu, bulapeli bwa luna, kuitingile ku sa bulela mutu yomumu, sa na bulezi mutu usili, mi, “Sepiso ki ya lusika lusili.”

<sup>120</sup> Muuna yomumu akile ataha kuna ha ki kale hahulu, neli mukutazi wa Baptist, kwani mwa ndu yaka, mi ali, “Wa ziba,” ali, “Ni—Ni bata fela ku ku sikulula fa taba yeňwi.”

Se nili, “Sikamaňi?”

Ali, “Usweli kulika kuluta Tuto ya buapositola ni mwa lusika lo.” Ali, “Lusika lwa buapositola lufelile.”

<sup>121</sup> Se nili, “Lili?” Mwabona? “Ni ka ku bulelela fo ne lu kalezi, wena uni bulelele fo ne lu felezi.” Se nili, “Kana wa lumela Linzwi?”

Yena ali, “Na lumela.”

<sup>122</sup> Se nili, “Ku lukile. Cwale, ka Lizazi la Pentekota, kikuli wa lumela kuli fani kona lusika lwa baapositola fo ne lukalezi?”

Ki hali, “Na lumela.”

<sup>123</sup> Se nili, “Mi, mubuleli, Muapositola Pitrosi, abulela manzwi a.”

Mi muhupule, Jesu naize, “Yo kaufela ya ka zwisa Linzwi leliňwi ku Ona, kamba kuekeza linzwi leliňwi ku Ona, siemba sa hae si ka zwiswa mwa Buka ya Bupilo,” yani ki mukutazi kamba mutu usili ya na ni libizo la hae mwa Buka.

Se nili, “Pitrosi ali, ‘Mubake, maňi ni maňi wa mina, mi mu kolobezwe ka Libizo la Jesu Kreste kwa swalelo ya libi, mi mu ka amuhela mpo ya Moya o Kenile. Kakuli sepišo i kumina, ni kwa bana ba mina, ni ku ba bali kwahule, mane ni bao kaufela Mulena Mulimu wa luna uka biza.’ Kana ne lu felile lili cwale? Kamita lubile teni.”

Ki sikwata sa bo maankoli se si fetuhile kuba libungu, ni kutula tulela fa litupu ze shwile, lusika loluňwi kona lo ne lu li bualaile. Luli. Ha ki maana yenca yezwa kwa Lihalimu, nihanyinyani. Ha ba Li tabeli zani. Habana... . Habakoni kuba ni mukopano wa litapelo. Isiňi limbande, ka kukala; bunolo, isiňi kupazauha; itula tula fela.

<sup>124</sup> Kona mo iinezi kopano yaluna ya kacenu, ye itingile fa tuto ya za bulapeli ya ipangezi mutu, ku toloka Like ze kaufela ka mafosisa, mi ba si amuhela seo. Habana kunga Linzwi le li bulezi kuli, "Jesu Kreste ki ya swana maabani, kacenu, ni kuyakuile." Habana kunga Malaki 4. Mi hana kunga ona lisepiso zeñwi ze kaufela ze swanela mwa lizazi le, ni kubulela ka lusika lwa keleke. Ka mwa na bulelezi mupolofita kuli, "Ku kaba Liseli mwa ka nako ya manzibwana," ha ba ikungeli Se. Ba bata ku cuñutela ku se si bulailwe ki katengo ka Pentekota, mwaya ye mwanda kwa mulaho, kuca maana ye bolile neku. Yeo ki niti. Ha ki yende.

<sup>125</sup> Mulemuhe, keleke ki ya butu hahulu, ica nkukwe ya lifasi, lika ze shwile za lifasi, inge fela manoñu mwa ezezanga. Likeñi za keleke, haba tuheli Moya o Kenile kuli ulume mutu kwa keleke; bana ni kuba ni likeñi mi ba bone kamba kopano ika mu amuhela kamba nee. Yeo ki niti. Baswana sina lifasi. Ba apala sina lifasi. Ba bonahala inge lifasi. Ba eza sina lifasi. Ki manoñu, inge lifasi. Ba na ni buzwa, ba bunolo, bakeshebisi. Kona fela zeliteni ku zona.

Kana mukile mwabona mbande ye keshebisa? Batili, sha. Hakuna kukeshebisa ku yena. Kamba nihaiba yena Mukreste wa niti. Ha ki ya bunolo. U ka zuma kufitela a I fumana. Amen. Eeni, sha. Uka fumana Nama ya hae. Ubata Maana ye nca. Uka katafafasi kufitela a I fumana. Uka fufela mwa halimu halimu. Haiba hakuna ni yekana mwa libala, uka pahama fahalimu nyana. Hauya upahama mwahalimu, kona mo ka bonela hande. Kacwalo seli nako ya limbande za lizazi la kacenu kukala kufufela hahulu mwahalimu, kukata mwa lisepiso za Mulimu, isiñi kupila ka lico za manoñu ze bulailwe myaha ya kale koo; muzwe ku zeo.

<sup>126</sup> Likeñi la na, liketisa za kukenya ni kuzwisa, kubulela *se, sani*, ni *sesiñwi*, mi Moya o Kenile hausana tukuluho ya kukena mwa keleke kufita mo ku swanehela. Hakusana mikopano ya litapelo, hakusana kutwelana butuku ka Mulimu ni kutaleleza Linzwi la Hae! Hakusana kulumela kuli Linzwi li sa swana maabani, kacenu, ni kuyakuile! Ba tezi fela mikwa ya bunoñu, bana ni kopano, ba beile libizo la bona mwa buka; mi se bana ni buzwa ni kuba bunolo, mi baikinela kwani ni ku tabelka nkukwe yeñwi ye shwile. Mi, cwale, ilukela kuba maankoli yeswana ni mbande yena muzwale wa wa hae, mupolofita yana tisize Linzwi la niti ni ku Li bonahalisa.

<sup>127</sup> Kuitinga fa lituto za bulapeli ze bolile neku, za ipangezi mutu. U li zusa kai zeo? Mwa koranta yeñwi ya litukiso za sikolo sa la Sunda za ipangezi mutu, zana mu bulaezi muituti yomuñwi kwa kale mwa mukopano wa za bukutazi, a mu bulelela kuli, "Mazazi a limakazo a felile. Nekusina sika se si swana sina kolobezo ya Moya o Kenile. Ze Kaufela ki bukuba." Mutualusa kuli mbande yakona kuca zani? Haikoni kuca zani. Batili, sha.

<sup>128</sup> Mane nihaiba Mukreste hakoni ku ca nkukwe ya kale ya lituto za likopano ni lika zeñwi. Ubata Linzwi la Mulimu, lelinca, yona sepiso ya hola. Mulimu na sepeisize tushakame mwa mazazi a Luther. Na sepeisize lika zeñwi mwa mazazi a babañwi. Kono cwale U lu sepeisize Sico se si kwanile hande, ili Papazo ye nani lico mwa mifuta kaufela yesupa, kakuli Maswayo Asupa kaufela a kwaluhile, ni lika kaufela li lukile ka Linzwi la Mulimu, ku bao ba bakona ku amuhela! . . . ? . . .

<sup>129</sup> Bo maankoli ba bacuñuta inge sibungu. Oh, mawi! Munahane kazona, mo libezi zetata, kiñi—kiñi ka hola ye. Kuswana fela inge maankoli mo i latehiselize zibahazo ya yona yakuba maankoli, kona ni keleke mo i latehiselize zibahazo ya yona kale ko kakuba (nyunywani) yenyinyani ili munyana mbande, mapolofita ba Mulimu.

Sapili neibanga sishimbelo sa linzwi la niti, kuluka; kasamulaho, yaba sishimbelo sa kukeniswa; mi, yaba sishimbelo sa kolobezo ya Moya o Kenile, kukutisezwa kwa limpo. Kono he, Yena ha kala kuzamaya: ni kukuta mwa mulaho, kulika kuca sesiñwi, manna yezwa mwa lizazi lisili, i bolile, haisali yende.

Mbande ya niti ya lizazi le iziba kuli yeo ki niti. Kono luna ni sani, hape, kufitela Jesu Kreste a bonahazwa mwa mutalelela wa mata a Hae, sina mwa Na sepeiselize kuba cwalo mwa lizazi le.

<sup>130</sup> Fa cwale seli sikapi se si omile. Si felile; Moya wa Mulimu nofitile ku yona, ki niti. Mi haina kuba, haina kuca sanda hamoho ni Peu ya Linzwi ye pakilwe. Kaniti haina kuba. Haina kuba mwa Kuungelwa. Ikaba membala wa keleke, yakona kutaha mwa zuho ya bubeli, ku atulwa kuya ka si iutwile.

Haiba muteni mo busihu bo, mi ki membala wa keleke fela, katulo ya hao ika yoba cwani, kanti luna kaufela lu ka yo yema kwani ni bupaki fa toho ya hao kuli no utwile Niti? Mwabona?

Haisa fufa kukena mwa mbyumbiyulu, kukena ku ze sa zibwi, kukena ku za buipiteli, koo Mata ni bupahamo, ni lisepiso za Linzwi la Mulimu la Kuyakuile ha li ezwa kukonahala, “lika kamukana ku ba balumela.” Haina ku lumela Zani, ya bulela. Ika wela fela fa muhala wa luwaile, ni kubulela kuli, “Kopano ya ka ibulela kuli tushakame tu iketile.” Ni ha tutezi mabuku ku tonia, kono, kanti, “Kaufela liiketile,” mwabona. Iitingile ku sani.

<sup>131</sup> Pentekota iswana ni kezela yona wa linoñu la kopano, ye inzi cwale mwa “lipula zetuna za katengo kakasina bumulimu,” kaniti, ku uteeleza kwa bulifasi bwa hae, baeteleli ba litaba za nahua ba mu cisa lico za manoñu za tushakame totushwile, za lika zeñwi ze felile, ka myaha ye mashumi aketalizoho. Bwani kona buino bwa keleke ya Pentekota. Oh, mawi!

<sup>132</sup> Kuswana fela inge Sarah hana lika kutisa sepiso ya za buipiteli ka—ka kuikungela Hagare, kona mo iezelize ni keleke, ilika kutisa ancafazo. Babuleli baluna babatuna mwahala linaha kacenu, “Ancafazo mwa nako ya luna! Ancafazo mwa nako ya

luna! Mina ba Methodist kaufela, ba Baptist, ma Pentekota, mutahe hamoho kamukana.” Kana mukona kuba cwani ni ancafazo ya Maana yenca, fa lico ze shwile, za manoňu? Mukona cwani kuba ni zona, ancafazo mwa nako ya luna?

Ancafazo ikaba ye nyinyani hahulu habana kuziba kuli ikile ya ezahala.

<sup>133</sup> Mapentekota bali, “Oh, kukaba taba yetuna yeka ezahala.”

Kwa ezahala, mi ha ba izibi. Mwabona, kona cwalo. Mwabona? Eeni, sha. “Kakuli ko kuna ni Situpu, ki kuka kopanela limbande,” kuya fela sina lifasi. Mwabona? Sani kona se Li bulezi. Situpu ki sikamaňi? Ki Linzwi. Ki yena Linzwi, kona Situpu, Kreste! “Kreste ku mina,” ya swana maabani, kacenu, ni kuyakuile. Ka mo Li bezi la za niti!

<sup>134</sup> Sarah, ka kulika kueza lisepiso kaufela kutalelezwa, mwa bona, mwa butuna... inge keleke ya kacenu, “ancafazo yetuna mwa nako ya luna,” (ka sikamaňi?) ka sepiso ye lyangani. Muka eza cwani zeo, kanti Mulimu ali kuba afuyaule katengo?

Na si ka itusisa fateni katengo. Fani liňusa hane li lumilwe, mi se ba ongaonga, ne ishwezi ona fani. Ni shemaeta muituti wa litaba za kale kaufela ku ni bonisa ko ne ikile ya zuha hape. Ne ishwezi ona fani ni kuinelela ona fani. Mulimu na zwile fela mwateni ni ku comoha mwa shimbelo sani, kuckenmo kuňwi; kuzwa mwahala ma Lutheran, kucken mwahala ma Methodist; kuzwa hape mwahala ma Methodist, kucken mwahala Mapentekota; cwale U shimbulukile kuzwa mwahala Mapentekota, ukeni mwa Peu.

<sup>135</sup> Kakuli, ilukela kuba Peu. Hamukoni kupuma ze bupilwe. Hakuna mukwa, hakuna sesiňwi se si kona kuezahala kwanda Peu, kacwalo Peu ika itahisa Iliyona. Yena wa swana maabani, kacenu, ni kuyakuile; ona Siita sa Mulilo se siswana, kubonisa lisupo zeswana, ona Mata aswana, yena Mulimu yaswana, zona limakazo zeswana, taba yeswana, ne lipakile Linzwi ni Bibele, ona cwalo fela. Yena wa swana maabani, kacenu, ni kuyakuile. Wa etelela, busihu bo. Mulimu lu konise ku Li bona ni ku Li lumela! Luli!

<sup>136</sup> Mwabona, Sarah, yena keleke, Hagare ya na nopilwe fela ka lizoho. Ne li sika beleka. Nji cwani? Batili. Sikwata sa hae sa kusupa fela ka mazoho hasina kubeleka kacenu, nisona. Madokota ba lituto, ni ma Ph.D., ni ma L.L.D., halina ku kondisa lika. Lishimbelo kaufela lipalezwi.

Luther na palezwi, sina Hagare mwa na ezelize. Ki sikamaňi sana ezize Hagare? Hagare nafile mwana hae kuba mwa sifuba sa musali usili (ki niti yeo?), kuli amu utele mwana hae. Hagare na ezize cwalo; afa mwana hae wa mushimani, mwana hae wa mushimani anosi, mwa sifuba sa musali usili (isiňi sa mahe), kuli amu ute. Yani kona taba yeswana ya na ezize Luther fani hana

file mwana hae wa mushimani, kuluka, kufiwa kwa kopano kuli ibe mwa bukuba ni yona, kona ona cwalo, kuli imu ute.

<sup>137</sup> Wesley na palezwi ka nzila yeswana inge Sarah mwa na palelezwi, kukakana na kakanyize za Kupepwa kwa buipiteli kakuba kolobezo ya Moya o Kenile, inge Saraha mwa na ezelize mwa kota ya oke. Fani Wesley hana zibahalizwe kwa lika za buipiteli, fani lusika lwa Pentekota hane lutile mi Wesley atiswa ku za kubulela ka malimi ni Ze kaufela, ne ba sehile ni kueza lisomo ka Zona. Mina ba Church of Christ kaufela, ni mina, baba ipiza cwalo, ni mina ba Baptist, ni ba Presbyterian, mañi ni mañ wa mina, ne mu nanuzi lingo za mina mwahalimu, ku Zona, mi mwa ikela kusili kwahule ni Zona. Luli. Ki sikamañi sono ezize, Wesley? No lekisize mwana hao kwa katengo, mi ya shwa ni ku yunda. Kona ona cwalo.

<sup>138</sup> Kono, haili Linzwi, Linzwi la niti ne li ile ona cwalo. Ne li si ka ina mwa katengo kani. Ne li zamaile kukena mwa pentekota, ni kunga zeñwi nyana ka yona. Neli Mwana ya na sa hulile nyana, inge Peu yene wezi mwa mba; mi, kasamulaho wa nako, Ne li kalezi mwa moongola wa mukokoto, mi ni kuba ni maswafu, mi ne ina ni toho ni mautu.

Mi, kasamulaho wa nako nyana, Ne li fitile fa nako ya ku to pepwa kwa Hae. Yani ki niti. Kacwalo, cwalo kona Keleke mo ihulezi, ka nzila yeswana.

<sup>139</sup> Wesley na kakanyize inge Sarah mwa na ezelize mwa kota. Na bulezi... Fani Lingeloi la Mulena, ali Mutu, yana apezi inge... Kamba, mi Lingeloi, Mulimu, neli lona, Yena kasibili. Elohim, na apezi inge mutu, na yemi fani ni maluli fa liapalo za Hae, mi abulela kuli Na file sepiso; kasamulaho Sarah hana nani myaha ye nainte naini ya kupepwa, mi Abrahama neli wa myaha ye mwanda ya kupepwa.

Mi Sarah aseha hahulu, mi ali, "Kana ze likona kuba cwani, mi Abrahama mi ni Na hanina, kihande, halusika ba inge batu ba sanana, tamahano ya lubasi, mwendi ka lilimo ze mashumi amabeli." Nali fa kaufi ni lilimo ze mwanda za kupepwa. Ali, "Na, nibe ni munyaka ni mulena ka, na ya supezi, mi ni yena ali muumbulu, hape? Mi nuka ya hae ya bupilo i shwile, mi ni mba yaka se i omelezi. Mazwele aka a fopile; misinga ya mabisi i kangezi. Kana Ni kona cwani kuba ni zeo?"

<sup>140</sup> Mulimu ali, "Ni li sejisize. Wa taha, nihakuli cwalo!"

<sup>141</sup> Kona mwa na ezelize ni Wesley. "Kana lukona cwani ku amuhela bani baba bulela mwa malimi, ni foliso ya Bumulimu, ni zeñwi. Ha ki za luna mwa lizazi le."

<sup>142</sup> Mulimu ali, "Ni sejisize, 'Mwa mazazi a mafelelezo Ni ka sulula kwa Moya wa Ka fahalimwa nama kaufela.'" Na sejisize kueza cwalo, mi A zwelapili ku yo lipeta, nihakuli cwalo. Mi ba keleke ya ba Wesleyan, ni likezeli za yona kaufela za muuku wa mununo, wa ba Baptist, ba Presbyterian, ni Church of Christ, ni

ba Nazarene, ba Pilgrim Holiness, ni ba United Brethren, ni bao kaufela, ne ba shwezi ku zona. Mi Keleke ya zwelapili ku zona.

Cwale ki sikamañi sene iezize Pentekota? Ne i kopanyize, kuswana fela inge sikapi. Ne i ezize zeswana. Ne i ikongakongile ili yona hamoho, ne ikinezi inge sikapi. Yani ki niti.

<sup>143</sup> Pentekota ne iswana sina Maria. [Hakuna manzwi fa tepu—Mu]...mukiti wa pentekota, mutualime sa na ezize Maria. Ki sikamañi se si maswe sa naezippe Maria? Kwa mukiti wa pentekota, nako yeñwi, na talimani ni sikkwata sa baituti, ba prisita. Fani, Mwana hae wa mushimani, na si ke ku Mu fumana kai kamba kai. Mi akuta mwa mulaho, musipili wa mazazi amalalu.

Na Mu siile. Inge keleke yenca ya kacenu, ka linako zetalu ni zeketalizoho, kamba mashumi amabeli ka aketalizoho, keleke izwile, seli myaha ye mashumi aketalizoho, kamba sebente faifi.

<sup>144</sup> Na Mu siile kwa mukiti wa pentekota. Maria na kutile ni Josefa, mazazi amalalu, inge ba Mu bata bata. Na sweli kutalima talima ku Mu bata; neba si ka Mu fumana.

A Mu fumana. Ki sikamañi sa na fumani? Na Mu fumani mwa tempele, inza ambola Linzwi la Mulimu ni baprisita. Mi ona kwapata a baprisita bani, baika bani, Maria na tuhezi masila ku wa. Na ezize ona cwalo lika za na sa lukeli kueza.

Mumubiza kuli, “Mulimu; mahe Mulimu”? Mahe mutu ulukela kuba ni butali kufita mwaha hae.

Mi ki hali, “Bo ndataho ni Na lu Ku bata-batile ka mioko, ka musihali ni busihu.” Huh! “Bo ndataho ni Na,” inza bulela kuli kupepwa kwani ne si kwa buipiteli bwa bumulimu, kuli Josefa nali ndatahe Jesu. Na latuzi kupepwa kwa buipiteli bwa bumulimu.

Pentekota ne i ngile za kubulela ka malimi. Ne ba hanile Kupepwa kwa Linzwi. Kona mo ne ba ezelize ona cwalo. Li ka ba ni zeñta hahulu za Teni, kono habana kunga ze siyezi za Teni. Ne li hanile Kupepwa kwa Linzwi, inge fela Maria mwa na ezelize. Kono, mutualime, hakuna kuba ni haiba kopano yekana kasamulaho wa Ye.

<sup>145</sup> Mutualime Linzwi Kasibili, ibo, neli wa myaha ye lishumi ka yemibeli, ki nto fela yelikani mwa sikapi kwa mulaho, Ki hali, “Kikuli ha muzibi kuli Ni lukela kuba fa musebezi wa Ndate Luli?” Linzwi ne li sikulula keleke, ona fani.

<sup>146</sup> “Kiñi ze mu ezeza lika ze kaufela? Mwa ziba kuli hamukoni kueza se. Lu ka kwala minyako yaluna; haluna ku ku tuhelela kuli ukene mwateni.”

<sup>147</sup> “Kana hamuzibi kuli Ni lukela kuba kwa musebezi wa Ndate waka?” Mwabona? Luli, luli, za buipiteli za niti!

<sup>148</sup> Litohonolo, musali na Mu biza kuli ki mwana Josefa, kuli ki mutu fela. Kamba, sene i ezize Pentekota, na Mu bulela fela kuba “alimuñwi wa ba balalu.” Whew! Ni ziba kuli seo sa holofaza, “alimuñwi wa ba balalu.” Kono Yena nali zona zetalu kaufela, ku Alimuñwi. Na si alimuñwi wa zetalu. Kono haili ba Pentekota, “Oh, eeni, Yena ki Mwana wa Ndate, wa Moya o Kenile, he . . .” Oh, mawi!

Kono ha niti, Linzwi niti li bulela ka kusepahala hande, mi lali, “Ha ki ba balalu ba bona. Yani ki alimuñwi.” [Hakuna manzwi fa tepu—Mu.] Amen. Ha mu zibi Linzwi la Mulimu? Musike mwa lieza zetalu; kono ki Alimuñwi.

<sup>149</sup> Mulemuhe, hakusana kuba lishimbelo nihanyinyani, keleke ya mushemi, likopano, kuya ka sishimbelo sa sikapi se.

<sup>150</sup> Kakuli, kuya ka sikapi, kuna ni zeñata, hakuna se si siyezi kwanda Bubeke. Ki niti yeo? I lukela kuba Bubeke. I lukela kuba mufuta o swana o no ile mwa mubu, Jesu Kreste ki ya swana maabani, kacenu, ni kuyakuile, Moya utile ku Munyaliwa ku to eza lika ze swana za Na ezize. Mwabona? Ki ku itahisa fela kwa Bubeke.

<sup>151</sup> Linzwi, ibo lili lelinyinyani, ne li ipulelezi Lona liñi, “Mi kikuli hamuzibi kuli Ni swanezi kuba fa musebezi wa Ndate Luli?” Huh!

<sup>152</sup> Yani kona kunutu ya Liñusa cwale, ona cwalo fela, “musebezi wa Ndate.” Musebezi wa Ndate ki sikamañi?

Kikuli mwakona kunahana kuli musebezi wa Ndate neli sikamañi, ku Yena? Ku taleleza sa na bulezi Isaya kuli, “Mwalyanjo uka itwala.” Kutaleleza sa na bulezi Isaya, hana ize hape kuli, “Lihole li ka tulaka sina puti,” ni lika ze kamukana kuli ne li ka ezahala. Sina Mushe hana ize, “Mulena Mulimu wa mina uka zusa Mupolofita, mwahala mina, ya swana sina na.” Neli musebezi wa Ndata he, kutaleleza Linzwi lani.

Kihande, haiba sani ne si taha ka mataka ani, ka basali ba nama bani; kucwani he ka mataka a moya a, basali ba keleke? Likeleke litalusa basali, *basali* batalusa “likeleke,” nitaluse. Ki niti yeo nji?

Konakuli seli sikamañi cwale? “Lu swanelia kuba fa musebezi wa Ndate,” Buloto bu ka huwa sinca, kwa Bubeke. Eeni, sha. Ki sikamañi se ilukela kueza? Kupaka Malaki 4, kupaka Luka 17:30, kupaka Maheberu 13:8, kupaka Muñoli Joani 14:12, kupaka Linzwi la Hae kamukana. Kupaka Maheberu, Ni talusa. . . Sinulo, kauhanyo ya 10, ka kukwalula kwa Maswayo Asupa, ni likunutu za Mulimu; nihaiba ka za peu ya noha, ni zeñwi kaufela, li ka bonahazwa; linyalo ni telekano ni likunutu zeñwi ze kamukana ze ne patilwe mwatasa misumo mwahala myaha ye kaufela, kuzwa kwa baituti ba litaba za bulapeli ni babañwi cwalo, kono cwale seli hola. Wani kona musebezi wa Ndate.

Munahana kuli ne ba ka Li amuhela? Ba bata kuli ba zibahale, ni kubulela kuli, "Kopano ya luna ha i lu luti Sani." Kono Bibele ya luta cwalo. Yeo ki niti.

<sup>153</sup> Mulimu wa Li paka kuli ki niti. Luli, Li talelezwa mwa lusika lo, fani Maswayo Asupa... Kamba, ka kupaka fela kuli likopano libile fela lishimbelo, wani ki omuñwi wa misebezi ya Ndate, kwa kupaka. Mi musebezi wa Ndate cwale ki ku mi bonisa kuli likopano zani ha ki za Hae. Ki milao ya ipangezi mutu ye hana Linzwi. Luli. Mulemuhe.

Mu li, "Kihande, Maria, yena mwalyanj-... mwalyanjo yomutuna!"

<sup>154</sup> Fa sifapahano, Na si ka mu biza kuli, "ima." Na mu bizize kuli, "musali," sishimbelo, isiñi ima. Mwabona? Niti, na li sishimbelo sa Linzwi, kono na si Linzwi. Yena neli Linzwi. Oh, eeni.

<sup>155</sup> Mulemuhe, hape, na si ka zibahazwa mwa zuho hamoho ni Yena. Na shwile ni kuzuha hape, kakuli Na li yena Linzwi. Musali nali fela sishimbelo. Na shwile, mi usali mwa libita. Yani ki niti. Kacwalo, musali nali fela sishimbelo, isiñi kuba me wa Hae, isiñi Mulimu. Na li fela sishimbelo inge likeleke mo liinezi. Yani ki niti. Ku bonisa kuli na li fela sishimbelo, isiñi kuba Linzwi.

<sup>156</sup> Halu kwaleni ka kubulela cwana. Oh, bo maankoli ba Mapentekota, inge mu cuñuta sina manoñu, mu ca za lifasi sina babañwi baba siyezi mo ba ezeza, "kuba ni mufuta wa bumulimu, wo kona kupuma ba Baketilwe kambe ki nto ye konahala, kono ba latula Mata ateni," sina mupolofita ha bulezi fa. Mutala o petehile wa seo Linzwi la Mulimu li bulezi kuli si kaba teni mwa mazazi a maungulo, lusika lwa keleke ya Laodesia, u "mapunu, sibofu, umubotana, unyandile, u mwelwa, mi ha uzibi cwalo; uipapata kuli ki yo mutuna mi u fumile, 'hana sa tokwile.'" Mi ha zibi kuli u fetuzwi kwa kuba maankoli, muzwale ya swana ni mupolofita, kuli abuluke Linzwi la Mulimu ona cwalo; ufetuhile kuba linoñu, ni ku fepa batu ba hae ka lituto za tushakame to tu shwile twa lituto za bulapeli. Ki niti luli. Mu zuhe! Mawi, mu libelela cwani ku zibahazwa, kamba ku ca sanda ni limbande, foo lika ze cwalo mwa hola tuna ye ya Kuungelwa ha ili fa kaufi?

<sup>157</sup> Oh, Mukreste, oh, mulumeli, haiba ubile mulumeli wa sihalihali, uzwelepili kutahanga kwa mikopano fa nako nyana fela (mukaeza cwalo?), luna ni sesiñwi fa se Ni lumela kuli Mulena ubata kuli uzibe.

Nako ifelile; Hanikoni kuzwelapili hape. Ni lukela kukwala, mi mwendi lu ka fela kamuso busihu. Kono, mutualime, halu inamiseni litoho za luna fa nako nyana.

<sup>158</sup> Hani lati kuli mulemuhe Sikuwa se Ni itusisa, kono Ni bata kuli mu utwe fa muzuzu fela se Ni bulezi. Ki nto ye patalala kuli

mu utwisise, Na ziba, haiba mu itakaleza cwalo. Haiba muteni mo busihu boo, mi mutokwile kutwisiso ye... .

Hani buleli kuli... Mu li, "Ni binezi mwa Moya, kutulaka kafa ni kafa." Eehe, bo maankoli baezanga lika zeswana, inge fela mañwalala ni manoňu. Hani kupi seo.

Ki sikamaňi se mu ca ku sona? Muzusa kai lico za mina ka zazi? Mu ca likamaňi, ki kwa Linzwi la Mulimu kamba ki kunzwe yeňwi ya kale yene siilwe kale koo, myaha ni myaha kafoo? Kikuli kutwisiso ya mina, nihaiba busihu bo, ka sesiňwi sene mu nopile myaha yemiňata kafoo; kamba ki ze mezi ni ze nca busihu bwa kacenu, Maana ye nca yene wile kwa Lihalimu, mi musweli kufepa moyo wa mina ku Yona, mubata bata kamuso sika se si nca mi se sinde? Haiba ha mu yo cwalo, cwale ni litoho za mina ze inami ni meeto a mina a kwalilwe, ni lipilu za mina ze inami, muipuze ili mina puzo ye sepahala. Mi isiňi ku na, kono ku Mulimu, kikuli mu ka nanula mazoho a mina kuba bupaki, ka kubulela kuli, "Mulimu, kondisa moyo waka ni moyo waka, kuli Ni ce fela Linzwi la Mulimu." Kikuli mu ka nanula mazoho a mina, muli... Mulimu ami fuyole. Mulimu ami fuyole.

<sup>159</sup> Hani zibi fela kuli ki babakai babali mwahali mo, babali teni, busihu bo. Hani zibangi buňata bwa sicaba, kono Ni ka bulela buňata luli bwa bona, kamba kufitelela, baba nanuzi mazoho abona, baba bata ku kondisa mioya ya bona. Halu hupuleni mwa tapelo cwale hanze luinamisa litoho za luna.

<sup>160</sup> Mulimu Yomunde, Ni na ni mulatu fela wa kubulela Linzwi. Mi ka linguli nyana ze, mifuta nyana ye, batu baboni kuli yo hana kuca sanda hamoho ni yomuňwi. Mi luziba kuli mwa mazazi a maungulo kukaba batu baba ka ngelwa mwa Lihalimu, mi babaňwi ba bona bakaba fa Jesu ha ka yo kuta. Mi lu Mu libelezi kuli atache nihaiba busihu bo.

<sup>161</sup> Mi Ni nahana ka mashumi amalalu, mwendi myaha ye mashumi amalalu ka zetalu yefitile, ne ni kubami mo ka nako ya busihu bo, ka nako ya naini seti kamba teni kiloko, ku lapelela ndate yana latehile. Busihu bo, Mulena, Ni lapelela bo ndate ba baňata, boma ba baňata, ni mizwale ni likezeli. Kikuli ha Una ku ba ni sisshemo, Mulimu yomude? Se ku liyehile cwale kuli ndate aeze sika kaufela ka sona; sa silezi kwabuse bwa miseto ya bupilo bo. Mi cwanoňu, Mulena, luna kaufela lu ka fita nzila yani. Nina, cwalo, ni swanelia kuya ka nzila yani. Muuna kaufela ni musali, mushimani ni musizana, mwahali mo, una ni kuya ka nzila yani. Mi luka yo ikalabela ka se lu eza kuamana Linzwi la Mulimu.

<sup>162</sup> Muuna yani mwa na bonahalezi bunyinyani, fa pila Davida, fani ha na mu kwelaka mati! Ka mo baka nahanelia batu bani, bene ba kwelaka mati Jesu yena Linzwi, ka nako Ha kuta hape, ni bona bene ba Mu tabile. Ka mo baka ikutwela bunyinyani batu bani bene ba ile kwahule kuzwa fa mane ni kubona... mane isiňi ka manzwi amatuna a Sigerike, ni zeňwi cwalo, kono

mwa sibupeho se si petehile se si lu luta za Mulimu yena Mubupi; babakona kubona lishimbelo za Linzwi, ni kubona Linzwi lona Kasibili, mi ba ziba hola ye lupila ku yona, ni kuli nako ya kutulo i fitile.

<sup>163</sup> Mulimu Yomunde, lu si ke lwa fetulela mukokoto ya luna ku Lona, kwa bukuba bobuňwi bwa lifasi, kono halu Mu amuheleni busihu bo ka lipilu za luna kaufela. Mulena, bupa ku na moya omunde, ili Moya wa Bupilo, kuli Ni kone kulumela mwa Manzwi a Hao kamukana, ni kuamuhela Jesu yena Linzwi, ya swana maabani, kacenu, ni kuyakuile, ni kulumela kacenu fa siemba se si tomezwi mwa lusika lo. Lumeleza cwalo, Mulena. Ni kupa ka Libizo la Jesu.

<sup>164</sup> Mi cwale Ni ka kupa alimuňwi wa mina, hamunze muli mo ni kunahana se, ka kusepahala luli. Haluna keleke kuli mukene ku yona. Luna ni lisa kwani la ku kolobezwa ku lona, “Buňata bene ba lumezi ne ba kolobelizwe,” haiba ha mu si ka kolobezwa kale ka kolobezo ya Sikreste. Sani ha si talusi kufafalezwa, kusela; sani si talusa ka kunwelisa. Isiňi ka malumbatina a Ndate, Mwana, Moya o Kenile, kono ka Libizo la “Jesu Kreste,” sina keleke kaufela ne i kolobelizwe, kufitela keleke ya Katolika mwa 303 ha ne itilo zibahalisa balimu babalalu ni mifuta ye milalu ya likolobezo, mwa malumbatina a bulalu bwa bumulimu. Haiba mwali kuba mu be ni yani kale, kamuso kakusasana ka teni kiloko kuna ni liapalo ni zeňwi ze libelezi mina kwani.

<sup>165</sup> Kikuli hamuna kutaha mi mu to kopana ni Jesu Kreste, isiňi ni luna. Haluna keleke ni yekana kwanu ya ku mi babalela. Muye kwa keleke ifi kaufela ye mu tabela, kaufela ko mu zwelela, kono, shangwe, mulumele Linzwi le. Kana mwa li lumela? Muli, “Amen.” [Puteho ili, “Amen.”—Mu.] Mulimu ami fuyole. Mi mueze . . .

<sup>166</sup> Kuna ni sesiňwi se lukona ku mi tusa, luteni mo ku li eza.

<sup>167</sup> Cwale, Ni ziba kuli kuna ni bakuli mo. Nako ya luna i lu felezi, busihu bo, kuli lube ni mukoloko wa litapelo. Mwendi lu ka ba ni ona, niteni. Ni bata kuli mutu ni mutu wa mina ani ezeze sesiňwi. Mu inzi bukaufi ni mutu yomuňwi; mubeya mazoho a mina ku mutu yoo.

Mi hakuna ku kakanya mubeile lizoho la mina ku mbande, mwendi ki mbande yebile ica lico zeňwi za manoňu kokuňwi; sa kulile bakeňisa zona. Ha sa li tabela ni hanyinyani. Ubata kuzwa ku zona. U nyikwile mi ukatezi ka zona. Uteni mo busihu bo ni kubona seo limbande li kona kuca luli, lona Linzwi, mi ba be ni Kreste yapila mwahala bona, inza iponahaza ili Yena kuba yapila, ya swana maabani, kacenu, ni kuyakuile. Ha ba tabeli kuca sanda hamoho ni makapi; li fa kaufi ni kucisiwa. Mataka kaufela ni zeňwi li lukela ku ciswa. Mufefuli wa taha ku to shenga Buloto kwateni. Mu tabela kuba Buloto.

<sup>168</sup> Kuna ni babañwi ba ku bona ba ba kula, babañwi ba bona bakula mwa mibili. Ni bata kuli mu lapele, mbande. Mu lapelele muzwale wa mina, kezeli mbande kafo, hane Ni mi lapelela kwanu. Mi Moya wa Mulimu utahe fa halimwa mina.

<sup>169</sup> Muhupule, Ni mi fa Sico sa limbande, yona sepiso ya Mulimu. Na bizize bapolofita ba Hae, “limbande.” U ipiza ili Yena kuli “ki Mbande,” Ki yena Jehova Mbande. Mi hamunze mu beile mazoho ku yomuñwi ni yomuñwi, mu mu lapelele.

<sup>170</sup> Ndata luna yakwa Lihalimu, Linzwi la Hao lili, tumo ya mafelelezo yo No file kwa Keleke ya Hao, neli kuli, “Muye mwa lifasi kaufela, mi mu kutaze Evangeli,” ona litaelo zetuna, “ya lumela mi a kolobezwa uka piliswa; ya hana ku lumela uka beiwa mulatu. Lisupo ze li ka latelela ba balumela; ka Libizo la Ka ba ka leleka miyo ye maswe; ba ka bulela ka lipuo ze nca; ha ba ka nwa sifanu, ha si na ku ba tiseza kozi; ha ba ka swala linoha, ha lina ku ba taseza; mi ha ba ka beya mazoho abona ku ba bakula, ba ka foliswa.”

O Jehova Mbande, fepa babanyinyani ba Hao ka Linzwi lani, Mulena. Ba tokwile. Wani kona mufuta wa lico o ba tokwa. Sani kona se ba tokwa, ku ziba seo Sico sili sona, seo KISONA SA BULELA MULENA sili sona.

<sup>171</sup> No sepisize, wali ha ba ka beya mazoho a bona ku yomuñwi ni yomuñwi, kuli ba ka foliswa. O Mulena Mulimu, zusa ku kakanya kaufela ni milelo ya manoñu kuzwa ku luna cwale. Mi lu fepiwe ka kutala ka Sico sa Limbande, sa Linzwi la Mulimu.

<sup>172</sup> Tuhela kuli moya o masila kaufela oli mwa sicaba se, moya kaufela wa ku kakanya, moya wa sabo kaufela, kukakatela kwa kopano kaufela, mukwa kaufela, butuku kaufela, makulano kaufela ali mwahala sicaba, a zwe. Ka Libizo la Jesu Kreste, ha uzwe mwa sikuwata sa sicaba se. Mi ha ba lukuluhe ka yona hola ye kuya kwapili, kuli bakone kuca Sico sa Limbande seo lu lumela kuli Uka lu lumela mwa biki ye kaufela, Mulena, kupunya Maswayo akwaluhile ani ku lu bonisa likunutu zani ze patilwe kuzwa kwa mutomo wa lifasi, sina ha No sepisize. Ki ba Hao, Ndate. Ka Libizo la Jesu Kreste. Amen.

<sup>173</sup> Bao kaufela ba balumela mi ba amuhela, muyeme cwale, muli, “Na lumela. Na amuhela. Seo kona sana ni sepisize Mulimu, Na amuhela.” [Puteho ihuwa ka linzwi le lituna la kamuhelo—Mu.]

Mulena ami fuyole. Sani ki se sinde. Mutu kaufela ya yemi! Zeo ki zende.

Munembo, *Na Mu Lata*. Halu opeleni pina ye ku Yena cwale, “Na Mu lata, Na Mu lata kakuñi U ni latile pili.” Kaufela luna cwale.

Na Mu lata, (haiba mwa eza, halu nanuleñi  
 mazoho aluna) Na Mu lata  
 Kakuli U ni latile pili  
 Ni kuleka puluso yaka  
 Fa kota ya Kalvari.

<sup>174</sup> Oh, kana Ha ki yomunde nji? [Puteho ili, "Amen."—Mu.]  
 Halu swalani mwa mazoho yomuñwi ni yomuñwi. Muzwale,  
 mbande, mu fetuhe fela, kezeli, muswalane mwa mazoho,  
 halunze lu i opela.

Na Mu lata, . . .

Muzwale, mbande! Muzwale, mbande! Muzwale, mbande,  
 kukutaza Linzwi! Charlie, u zuha cwani? Mulimu aku fuyole,  
 muzwale. Ki tabo ku kubona! Mulimu aku fuyole, muzwale.  
 Mulimu aku fuyole, muzwale, mbande. Mulimu aku fuyole.

Fa kota ya Kalvari.

Halu nanuleñi mazoho aluna hape ku Yena.

Na Mu lata, Na Mu lata  
 Kakuli U ni latile pili . . . (mi U ku ezize  
 mbande)  
 Ni kuleka puluso ya ka  
 Fa kota ya Kalvari.

<sup>175</sup> Kana muka ziba cwani, kana lifasi li ka ziba cwani kuli mu  
 lata Jesu? Ki ha lu latana yomuñwi ni yomuñwi. Cwalo kona  
 lifasi . . . Mwabona, Mulimu ubona tumelo ya mina; lifasi libona  
 likezo za mina. Mutatane yomunwi ni yomuñwi cwale. Mube  
 ni makeke ku yomuñi ni yomuñwi. Mu bulelisane yomuñwi ni  
 yomuñwi. Mu utwelane butuku ku yomuñwi ni yomuñwi.

Ni litaelo zeñwi hape ze lu na ni kufa, kolobezo, kubata Moya  
 o Kenile . . . Haluna sibaka ni hanyinyani mo sa kuezeza zani,  
 mwa utwisisa. Pizo ya kwa katala, haiba Mulimu u mi kolwisiye  
 kuli Ye ki niti, kuli Jesu Kreste ki ya swana maabani, kacenu, ni  
 kuyakuile, mi mubata ku ikopanya ni Yena, mu ye mu kolobezwe  
 ka Libizo la Hae, kamuso. Ku kaba baana mwahali mwani ba ku  
 mi luta. Sika kaufela se lukona kueza ka ku mi tusa, lu ka si eza.

Na Mu lata, Na Mu lata

Mina fa mihala ya mawaile cwale, Tucson, ni mwa  
 California, kupunya ka foo mwa Upa, mu nanuleñi mazoho a mina,  
 kwande kafo mwa . . . ? . . . Mu Mu lumbeke!

Kuleka puluso yaka

(Ki mañi ya ka lu lukulula? Lu sikululela ku Muzwale  
 Neville . . . ? . . .) Cwale, kufitela kamuso busihu, Ni mifa  
 Muzwale Neville, mulisana wa luna.



*PEU HAINA SANDA HAMOHO NI SIKAPI* LOZ65-0218  
(The Seed Is Not Heir With The Shuck)

Liñusa le ka Muzwale William Marrion Branham ne li kutalizwe lwa pili mwa Sikuwa la Bune manzibwana, Yowa 18, 1965, ili fa Parkview Junior High School mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)